

春秋四傳斷卷之五

明 婁東張 溥西銘學

同里張 采南郭定

魯僖公

公名申，莊公子，閔公庶兄，母成風，夫人聲姜，在位三十三年，諡法小心畏忌曰僖。

壬惠王十年 戊八年 元年

春王正月

左傳 不稱即位。公出故也。公出復入不書，諱之也。

穀公

繼弒不言即位。

胡傳意同

齊師

桓 宋師

桓 曹師

昭

次于聶伯救邢。

左作曹伯

左疏 公羊穀梁皆以為齊師宋師曹師。皆是侯伯之

身。公羊稱不與諸侯專封。故變稱師耳。此時方始救邢。邢本不滅。何以言其封也。左氏無此義。將卑師衆稱師。此三國皆師多。而大夫將。故名氏不見。並稱師。公羊以爲此言次于聶北。救邢與襄二十三年叔孫豹救晉次于雍榆。二事相反。爲之作說。言此是君也。進止自繇。彼是臣也。先通君命。賈服取以爲說。杜以傳無此事。故不用其言。此時狄人尚強。未可卽擊。案兵觀釁。以待其事。須可擊乃擊之。故次在事前。穀不言齊侯者。救不及事。不足稱揚。胡三國稱師。見兵力之有餘。聶北書次。譏救邢

之不速。

夏六月邢遷于夷儀

公作陳儀

左邢遷如歸。故以自遷爲辭。穀遷者。猶得其國家。以往者也。其地邢復見也。公胡意

同左註

齊師宋師曹師城邢

左再列三國之師。不依前目。後凡者。於文不可言。諸侯師故也。公此一事也。曷爲復言齊師宋師曹師。不復言師。則無以知其爲一事也。穀是向聶北

之師。當言遂。今復列三國者。美齊桓存亡國。胡傳

秋七月戊辰夫人姜氏薨于夷齊人以歸。左傳在閔

公先言薨。後言以歸。而不言喪者。起桓公召夫人

于邾。歸殺之于夷。因為內諱。耻使若夫人自薨

于夷。然後齊人以歸者也。主書者。從內不絕錄。因

見桓公行霸。正誅不阿親親。穀胡意同

楚人伐鄭。荆始書楚。公穀無傳

左傳鄭即齊故也。公楚稱人者。為僖公諱與夷狄交

婚。故進使若中國。又明嫁娶當慕賢者。胡楚稱人

浸強也。

八月公會齊侯宋公鄭伯曹伯邾人于榿。榿公作打公穀胡無

傳

左傳盟于犂。謀救鄭也。註公及其會而不書盟。還不

以盟告。註公月者。危公會霸者而與邾婁有辨也。疏

既出尊者之側。而有私爭。故危之。

敗邾師于偃。偃公作纓。公羊無傳

左註虛丘邾地。邾人既送哀姜還齊。人殺之。因戍虛

丘。欲以侵魯。公以義求齊。齊送姜氏之喪。邾人懼

乃歸。故公要而敗之。穀不日疑戰也。疑戰而曰敗

勝內也。疏何休云。公怨邾以夫人與齊。故敗之。未

知范意。然不胡傳既會邾人于榿。又敗邾師于偃。責

公無攘夷狄安中國之誠。

冬十月壬午公子友帥師敗莒師于鄆獲莒拏鄆公作拏

穀作麗

左莒既不能為魯討慶父受魯之賂而又重來其

求無厭故嘉季友之獲而書之穀言獲惡公子之

給公羊意同胡傳意同

十有二月丁巳夫人氏之喪至自齊

左齊人治哀姜之罪取而殺之則位絕於魯非復

魯之夫人其死不合書之於策以僖公請而葬之

外欲固齊以居厚內存母子不絕之義故具書於

經薨葬備禮諱之若言無罪而自死然既諱其殺

不宜有貶公羊傳曰夫人何以不稱姜氏貶曷為

貶與弑公也穀梁傳曰其不言姜以其弑二子貶

之也或曰為齊桓諱殺同姓也賈逵云殺子輕故

但貶姜然則姜氏者夫人之姓二字共為一義不

得去姜存氏去氏存姜公羊傳又曰曷為不於弑

焉貶貶必於其重者莫重乎其以喪至也案禮之

成否在於薨葬何以喪至獨得為重喪至已加貶

責於葬不應備文何故葬我小君復得成禮經無

姜字直是闕文公羊穀梁見其文闕妄為之說耳

胡傳書孫于邾薨于夷者絕哀姜也書齊人以歸夫

春秋四傳卷五
人氏之喪至自齊者。譏桓公也。不稱姓者。殺于齊。不去氏者。受於魯。

僖公。閔公之庶兄。閔公遇弒。其次當立。季友奉之適邾。慶父奔莒。乃入立之。正也。傳云季友將生。桓公卜之吉。成風聞其繇。事之。而屬僖公焉。若是則成季之立僖公。私矣。何以服國。其事誕不足信也。哀姜薨於夷。非薨也。齊桓公殺之也。桓公以義斷恩。猶石碻之殺厚。左氏謂其已甚。則婦人之仁矣。哀姜縊于夷。喪歸齊國。其時秋七月也。十二月喪至魯。其僖公請而葬之。與齊

侯使魯自迎歸。與俱。不可知。然夫人死矣。其罪服矣。書薨。書葬。如文姜焉。亦諱國惡之禮也。喪至自齊。書夫人氏。或云不稱姜者。以其與子般。閔公之弒也。或云夫人失母道。齊桓義討。疎而遠之。絕之于齊也。或云不稱姓。許齊桓之能殺。不去氏。罪僖公之受葬。以一字之闕。而立數義。說春秋者詳矣。揆其實。不如杜氏之言闕文也。檀之會。邾人在焉。方盟而即敗其師。何居。傳者各以意言。有邾謀侵魯。虛丘戍歸之說。甚而云為哀姜復讐。益荒矣。慶父奔莒。季友以賂求之。

莒人歸焉。及密而縊。不爲陳桓之殺。州吁而爲陳宣之納。宋萬莒豈無罪。又徵賂不已。至于用兵。季友敗之。獲其弟挈。厥功可嘉。儒者猶責其詐。何異左氏貶齊桓之殺哀姜乎。春齊師宋師曹師次于聶北。救邢。夏六月邢遷于夷儀。齊師宋師曹師城邢。善存邢也。秋楚人伐鄭。八月公會齊侯宋公鄭伯曹伯邾人于櫓。謀救鄭也。齊桓之功內莫大于殺哀姜。外莫大于存邢。二役舉而諸侯從天下正矣。

僖公二年

癸惠王十二年
亥九年

春王正月城楚丘

左不言城夷儀而言城邢邢已遷也。言城楚丘不公言城衛衛未遷也。穀不言桓公不與諸侯專封也。

胡傳
從之

夏五月辛巳葬我小君哀姜

左穀胡無傳

公註誅當絕不當以夫人禮書葬。書葬者正齊桓討賊辟責內讐齊。

虞師晉師滅下陽

公穀作夏陽晉始見經

左傳先書虞賄故也。公穀胡意同

秋九月齊侯宋公江人黃人盟于貫。公作貫澤

左疏公羊穀梁皆云江人黃人遠國之辭言其實是君也以其遠國降而稱也賈云江黃稱人刺不度德善鄰恃齊背楚終為楚所滅其意雖異皆以江人黃人為國君親來杜以諸侯之貶不至稱人則稱人者皆是其國之大夫爾齊桓威德稍盛遠國來服齊桓謙以接遠故與宋公會之。公羊大國言齊宋遠國言江黃則以其餘為莫敢不至也。胡傳江黃者其東方之與國也二國來定盟則楚人失其右

臂矣。穀梁同公羊

冬十月不雨。左胡無傳

公疏僖公喜于得立委任倍臣不恤政事故有此罰。穀註言不雨是欲得雨之心勤也明君之恤民。

楚人侵鄭。左傳闞章囚鄭聃伯公穀胡無傳

莊公三十二年狄伐邢。閔公元年春齊人救邢。春秋善之。僖公元年齊師宋師曹師次于聶北。救邢。夏六月邢遷于夷儀。三國城邢。齊之于邢也聞難而即赴既亡而能存得霸道矣。狄入衛。在閔公二年之十二月。僖公元年春正月始城。

楚丘不已緩乎。鄘風載馳之詩曰。我行其野。芄芄其麥。控于大邦。誰因誰極。當時大邦孰有如齊。齊而不救其無衛乎。許穆公夫人婦人也能閔宗國。齊桓霸王。寧獨後焉。左傳云。狄滅衛。衛之遺民立戴公于曹。齊侯使公子無虧帥車三百乘。甲士三千人。以戍曹。國語云。衛人出廬于漕。桓公城楚丘以封之。蓋狄入衛。懿公死。戴公立。十數日又卒。文公立。二公皆齊所定。齊非忘衛者所惡。獨懿公耳。懿公自幽盟不至。見討于齊。莊公二十八年三月之戰。衛人敗績。猶抗未

能從狄入衛。衛不聞告。急于齊。齊亦不出師來救。熒澤一戰。君死。國散。鄭使高克將兵禦狄於境。翱翔河上。衆散而歸。克乃奔陳。與國益無救衛者矣。齊力救邢。亦將懷衛。懿死。文立。斯克撫之。是以定之。方中美。衛文之復國。木瓜美。齊桓之封衛。傳反以城楚丘。爲罪。專封桓。不服也。說詩者又云。隱公七年。戎伐凡伯于楚丘。以歸。莊公十八年。公追戎於泲西。故僖公二年。城楚丘。以備戎。若是。則楚丘卽楚宮乎。或一據也。魯墓哀姜。如小君禮。子不出母也。慶父初弑閔公。夫人

孫邾季友亦奉夫人適邾豈以新君從夫人與齊人殺哀姜歸于魯而成葬季友固無志于討哀姜者也晉獻公伐虢假道于虞虞公愛其璧馬帥師以從遂滅下陽經首惡虞罪人得矣

附錄左二齊寺人貂始漏師于多魚虢公敗戎于桑田次盟貫後

僖公三年

甲惠王二三年
子十年

春王正月不雨夏四月不雨

左一時不雨則書首月公太平一月不雨即書春

秋亂世一月不雨未害物未足為異當滿一時乃書一月書者時僖公得立欣喜不恤庶眾比至三早即能退辟正殿飭過求已循省百官放佞臣郭都等理冤獄四百餘人精誠感天不雩而得澍雨故一月即書善其應變改政旱不從上發傳者著人事之備積於是穀經一時輒言不雨憂民之至

傳胡僖公賢君有志乎民冬不雨書春不雨書夏不雨書以著其勤

徐人取舒左穀胡無傳

左勝國而不用大師亦曰取公易者猶無守禦之備不為桓諱者刺其不救也

六月雨

左不曰旱不為災也公上雨而不甚也公僖公飭

過求已六月澍雨宣公復古行中其年穀大豐穀

僖公得雨心喜是於民情深胡閔雨與民同憂喜

雨與民同樂

秋齊侯宋公江人黃人會于陽穀

左傳謀伐楚也公此大會也曷為末言爾桓公曰無

障谷無貯粟無易樹子無以妾為妻穀以四教令

於諸侯其諸侯皆曉諭桓公之志不須盟誓故傳

詳其事胡諸侯之師同次于陘所謂聚而為正也

江人黃人各守其地所謂分而為奇也

冬公子友如齊涖盟穀作公子季友涖公穀作涖後

左註公時不會陽穀故齊侯自陽穀遣人詣魯求尋

盟魯使上卿詣齊受盟謙也公蒞盟者何往盟乎

彼也來盟者何盟于我也穀蒞者位也其不日前

春秋四傳卷五
定也不言及者以國與之也不言其人亦以國與之也

楚人伐鄭

公穀胡無傳

左傳鄭伯欲成孔叔不可曰齊方勤我棄德不祥

春秋災則書二年冬不雨書三年春夏再書左傳云不曰旱不爲災也不爲災何以屢書志勤民者之所憂也六月雨者六月夏政四月也建巳龍見萬物畢出古人始修雩祭是月而雨則無災憂可解矣公羊謂上雨不甚非也楚陵中國舒且比荆不取舒則伐楚之徑弗通故徐人

取舒書人書取謂其致順於中國也江黃之國微去年盟貫今年會陽穀桓勤交二國者爲其擬楚後得二國則楚勢乃阻亟書盟會曰是謀也臧桓霸其成矣公子友如齊蒞盟蒞臨也往受盟也使友者何桓謀楚楚知我謀則得備故不煩諸侯而使大夫卽事且審師期也楚抗霸豈能忘鄭于是乎伐鄭自莊十六年以來楚五加兵于鄭者爭鄭實爭中國爾故前此州舉曰荆入僖書楚人強之也所攘者強則攘之功著桓之功所以密也

采補

僖公四年

乙丑惠王二十二年
丑十一年四年

春王正月公會齊侯宋公

桓

陳侯

宣

衛侯

文

鄭伯

文

許男

僖

曹伯

昭

侵蔡蔡潰遂伐楚次于陘

註左民逃其上曰潰遂兩事之辭楚強齊欲緩之以

德故不速進而次陘

羊公

次于陘侯屈完也

梁穀

潰之

為言上下不相得也浸淺事也侵蔡而蔡潰以桓

公為知所侵也不土其地不分其民明正也

胡傳

侵

蔡者竒也伐楚者正也遂者繼事之辭而有專意

次止也

夏許男新臣卒

公羊無傳

左疏成十三年。曹伯盧卒于師。此不言于師者。穀梁

傳曰。諸侯死於國不地。死於外地。死於師。何為不

地。內桓師也。註云齊桓威德洽著。諸侯安之。雖卒於

外。與其在國同。賈逵云。不言於師。善會王加禮。若

卒於國。左氏無此義。註公不言卒於師者。桓公師無

危。不月者。為下盟。去月方見大信。胡傳諸侯卒于外。

在師稱師。在會稱會。許男一無稱者。此去師與會

而復歸其國之驗。非正也。其為人君不知命者也。

楚屈完來盟于師。盟于召陵。

左註楚子遣完如師以觀齊。屈完覩齊之盛。因而求

盟。故不稱使。以完來盟為文。齊桓退舍以禮楚。故

盟。召陵。公羊再言盟。喜服楚也。穀梁于召陵。得志乎桓

公也。得志者。不得志者也。以桓公得志為僅矣。胡傳

楚大夫未有以名氏通者。其曰屈完。進之也。其不

稱使。權在完也。來盟于師。嘉服義也。盟于召陵。序

桓績也。

齊人執陳轅濤塗

轅公穀作袁胡無傳

穀疏公羊左氏皆以為濤塗誤軍道。故齊侯執之。此

則以濤塗不敬齊命。故執之。陳之不敬。繇齊之無

禮不能自責。反越國而執其臣。故貶稱人。

秋及江人黃人伐陳。公胡無傳

左齊師不行。使魯為主。魯與江黃謀之。然後共伐。

故以與謀為文。穀何以文承齊人之下。恐非魯及。

故云內師。

八月公至自伐楚。公胡無傳

公楚叛盟也。註為桓公不修其師。而執濤塗故也。月

者。凡公出滿三時月。危公之。久。註穀會為大事。伐為

小事。今齊桓伐楚。而後盟于召陵。公當致會。而致

伐者。楚彊莫能伐者。故以伐楚為大事。

葬許穆公。穆公作繆。公穀胡無傳

左許穆公卒于師。葬之以侯禮也。註公得卒葬於所

傳聞世者。許大小次曹。故卒少在曹後。

冬十有二月。公孫茲帥師會齊人。宋人。衛人。鄭人。許

人。曹人。侵陳。茲公作慈。后同。霸國大夫會諸大夫。侵與國自此始。公穀無傳。

左叔孫戴伯帥師會諸侯之師。侵陳。陳成。歸轅濤

塗。註公月者。刺桓公不修其師。因見患誑。不內自責。

乃復加人以罪。胡稱人以執罪齊侯也。稱侵陳者。

深責之也。

桓公合九國之師伐楚。則伐楚耳。先蔡者何。去

楚蔽也。蔡文王冑實比楚爲蔽。曷不聲其罪。侵者何。蔡備則楚控其險。故潛師掠蔡。書侵蔡。曰知所侵也。惟蔡人亦以桓公爲知所侵。故群逃其上。書蔡潰。易也。受者易則加者得矣。有稱是師繇蔡姬者。圖楚久乃急所忿。且當敵。桓寧出此。於是遂伐楚。遂例曰繼事而專。大夫出疆苟利社稷專之可。况方伯連率而責其亟拜王命。非說矣。故書遂者。及事之詞。謂緩則楚備。且明意不在蔡也。時楚方懼。進可得志。而桓不欲戰。次于陘。師貴速進。次者有所俟也。桓何俟。曰俟

楚成也。本以義動。戰則勢在我。亦在楚。不戰則全乎義矣。屈完來盟。一盟爾。書于師。于召陵。曰言師不見。召陵言召陵不見師。于師則知屈完就師。志服楚于召陵。則知桓公師退。不疑于陘。志不以戰服楚也。書名氏。完服義也。不書大夫。楚無大夫。且諸侯與大夫盟。爲霸諱也。不稱使。一則權在完。一則嫌其太褒。如荆人來聘之詞。不盡與也。然桓之得志。僅矣。師歸乃執陳轅濤。塗尋轅濤塗之罪。辟車道爾。轅濤塗事陳。能憂其國。原情者所恕。旣執其身。復役諸侯伐其國。

春秋四傳卷五
且命大夫合諸侯大夫侵其國。怒未赫于楚而
逞之與國。伯業之衰。見諸其盛。君子賤之。故不
書齊侯。而曰齊人。惟齊人執轅濤塗。則秋伐陳。
冬侵陳。不言齊人。皆齊人矣。公至自伐楚。大伐
楚也。以則致。不因楚叛盟也。許男卒。劉氏謂棄
師歸國。如棄師。何以書葬。且桓張甚。新臣曷敢
自歸。穀梁子曰。不地。內桓師也。是春秋旨也。
宋補

僖公五年

丙惠王二十二年五年

春晉侯殺其世子申生

左稱晉侯惡用讒書春從告。公穀胡
意同

杞伯姬來朝其子 左胡無傳

左伯姬來寧。寧成風也。朝其子者。時子年在十歲

左右。因有諸侯子得行朝義。而卒不成朝禮。故繫

於母。而曰朝其子。公內辭也。穀伯姬託事而行。近

於淫泆。失為婦之道。杞伯不能防其閨門。今妻至

魯。失為夫之宜。魯待人之子。行待父之禮。失為主

春秋四傳卷五
之度。故三事同譏之。

夏公孫茲如牟

公穀胡無傳

左叔孫戴伯娶於牟卿。非君命不起境。故奉公命

聘於牟。因自為逆。

公及齊侯宋公陳侯衛侯鄭伯許男曹伯會王世子

于首止

止公穀作戴后同

左惠王太子鄭也。不名而殊會。尊之也。惠王以惠

后故。將廢太子鄭而立王子帶。故齊桓帥諸侯會

王太子以定其位。

公穀胡意同

秋八月諸侯盟于首止

左間無異事。復稱諸侯者。王世子不盟故也。王之

世子尊與王同。齊桓行霸。翼戴天子。尊崇王室。故

殊貴世子。

胡傳

首止之盟。美之大者也。

公穀意同左註

鄭伯逃歸不盟

左鄭伯棄其師衆。輕身逃歸。與匹夫逃竄無異。逃

在盟前。辟盟而逃。故云逃歸不盟。

公穀胡意同

楚人滅弦。弦子奔黃

楚始滅中國。公胡無傳

左江黃道栢。方睦於齊。皆弦姻也。弦子恃之而不

事楚。又不設備。故亡。穀不日。微國也。

九月戊申朔日有食之

皆無傳

春秋四傳卷五
公此象齊桓德衰。是後楚遂背叛。伐晉滅溫。晉里克比弑其二君。

冬晉人執虞公

左虞公貪璧馬之寶。距絕忠諫。稱人以執。同於無道於其民之例。例在成十五年。所以罪虞。且言易也。晉侯修虞之祀而歸其職。貢於王。故不以滅同姓爲譏。公虞已滅矣。其言執之何。不與滅也。穀執不言所于地。溫于晉也。胡傳其曰晉人執之者。猶衆執獨夫耳。

申生縊自殺也。斥晉侯殺者。成晉侯之殺其世

子也。申生奔新城。猶望自明。逮傳見殺。遂無所逃死。故書晉侯罪不君。書殺其世子。罪不父。世子名曰世子無罪也。杞伯姬。我伯姬。其子。我出我伯姬以其子來于庶人。可曰內辭。於國君不可曰內辭。君夫人已嫁。不踰境。書杞伯姬來。春秋之禮治。然伯姬歸杞。方十三年。子稚。既不勝朝。又王制。諸侯未冠卽位。稱童子侯。童子侯不朝。况未卽位。且魯素卑杞。弱其君。未必以人父之道待其子。書來朝。如諸侯相見之文者。杞惠公實病。伯姬豫托其子。故來。則授之以禮。春秋

春秋四傳卷五
之情恕也。公孫茲如牟。左氏以爲娶。或曰徵幣賦。春秋雖不書事。于義無譏焉。會首止。盟首止。桓霸之大美。曷美爾。惠王惑于惠后。將廢太子。鄭猶晉侯之驪姬。桓不謀。則王世子爲申生。而國危。桓合諸侯而請會王世子。則王世子定。而周寧。周寧不啻王世子不爲申生。且叔帶不爲夷齊。卓子。故晉侯殺其世子。而國亂者。凡二十年。齊桓會王世子。而亂階絕于一旦。則書會王世子。猶曰王世子在首止。公及諸侯往會焉爾。齊不敢當會主。故不書會齊侯。尊王世子也。王

世子尊。而王世子定矣。諸侯盟于首止者。盟諸侯。則謹信。盟王世子。則下防上。故復舉諸侯。明王世子不與。諸侯自盟焉爾。再言首止。明所盟之地。卽會王世子之地。則知諸侯盟。爲王世子也。鄭伯逃歸。不盟。誅鄭伯也。逃者。匹夫行。卽有王命。曷審諸義。今日孔叔以失親諫。不知前三年。楚伐鄭。鄭伯卽欲成。孔叔曰。齊方勤我。棄德不祥。則是桓十餘年。勤諸侯以固鄭。鄭無日無外志。首止。逃盟于王世子。無損。然鄭貳。楚生心。卽滅弦。楚敢背召陵之盟者。鄭伯致之。二十餘

年伯事害于匹夫則匹夫之故曰逃也日有食之天王有讒而不見將崩之應也晉人執虞公不言滅者虞不滅于執虞公滅下陽虞已滅矣故稱人以執執有罪也罪夫黷璧馬而亡國者稱虞公不與執也緼其地而執之加諸同姓惡晉狡著虞公之非所執也宋補

附錄左二正月辛亥朔日南至公既視翔遂觀

臺以望次五年春後陳轅宣仲怨鄭申侯次會于首止後

僖公六年

丁惠王二年
卯十三年六年

春王正月

夏公會齊侯宋公陳侯衛侯曹伯伐鄭圍新城胡無傳

左疏鄭人新築密邑經不稱圍新密言圍新城者鄭

以非時築城違禮害民齊桓聲其罪告諸侯故書

新城以為罪狀公註惡桓公行霸彊而無義也穀前疏

五年書鄭伯會而逃歸是罪著于上也今伐鄭又

言圍新城是討顯於下也

秋楚人圍許諸侯遂救許公羊無傳左傳載蔡穆侯將許僖公以見楚子面縛

壁街

穀善救許也。胡傳

冬公至自伐鄭

左無傳

公伐鄭救許皆不得意故以伐致。穀其不以救許

致何也。大伐鄭也。胡遂救許。善之尤者也。善之尤

則何以致。又也。

伐鄭罪逃盟也。伐國不言圍邑。圍新城其邑之

近楚者。誅鄭亦所以備楚。左謂鄭不時城。此則

罪微。桓寧舍逃盟而聲微罪。公羊乃惡桓強夫

鄭伯逃盟。逃王世子也。且害霸。圍新城。豈得與

圍長葛。圍緡。同譏。故楚人圍許。救鄭也。楚何以

不救鄭而圍許。知桓公必救許。則新城自解。桓

固不以許易新城。遂率諸侯救許。書遂救許。著

急義也。諸侯不復序。知伐鄭圍新城之諸侯遂

救許。則楚鄭之惡。其不反兵矣。公至自伐鄭。大

伐鄭也。不以救許致。出踰三時。以伐鄭故。救許

為伐鄭也。致伐鄭。鄭罪著爾。采補

僖公七年

戊惠王二十七年

春齊人伐鄭

公穀胡無傳左傳載孔叔請鄭伯下齊以救國

夏小邾子來朝

皆無傳

左邾黎來始得王命而來朝邾之別封故曰小邾

註公至是所以進稱爵者時附從霸者朝天子旁朝

罷行進齊桓公白天子進之固因其得禮著其能

以爵通

鄭殺其大夫申侯

左傳夏鄭殺申侯以說于齊且用陳轅濤塗之譖也

註申侯專利而不厭故稱名以殺罪之也公稱國

以殺者君殺大夫之辭也穀稱國以殺大夫殺無

罪也胡罪鄭伯兼罪申侯

秋七月公會齊侯宋公陳世子款鄭世子華盟于甯

母母音某又音無穀作寧母音同公胡無傳

左謀鄭故也穀衣裳之會也

曹伯班卒班公作般皆無傳

公子友如齊皆無傳

左罷盟而聘謝不敏也

冬葬曹昭公皆無傳

伐鄭鄭未服也齊力足以制鄭故不煩諸侯然

霸事仗義齊獨伐鄭則無以名是師書齊人并

譏霸也小邾子邾黎來也桓請爵于天子以爵

通故稱小邾子附庸魯故來朝禮也申侯鄭大

夫傳曰鄭殺申侯以悅于齊前四年齊師召陵

歸方悅申侯與以虎牢今殺之是殺齊所悅何

云悅于齊然孔叔請鄭伯救國公曰吾知所繇

來遂殺申侯則知逃盟之役申侯實導鄭伯從

楚蓋申侯固楚臣冀楚鄭交已得兩容鄭伯至

國危乃悟始殺申侯惟申侯專利即告齊桓以

資糧屏履引鄭伯以王命總以利諛人其見殺宜矣然鄭伯始則比以趨利既則借以紓禍不罪已而專殺甚失道矣書殺大夫志非刑也盟於甯母繇傳言之官受才物以貢天子齊桓明臣道辭鄭世子華之請齊桓正人倫然曰謀鄭而鄭世子與盟謂鄭服義則鄭伯何以不來謂鄭且服義先使子華求通則子華聽命于會可與盟不可且盟四國而二世子與何以示天下直書亦譏霸也曹伯班卒不日未訃也曹何以不訃嗣君未立不暇訃也春秋外諸侯卒雖不

訃我往弔則書爾公子友如齊公與友同心事齊故甫盟甯母又往修聘禮諸侯不相朝聘故止言如而霸好勤矣

宋補

僖公八年

已惠王二十八年

春王正月公會王人齊侯宋公衛侯許男曹伯陳世子欵盟于洮鄭伯乞盟

陳世子欵下公有鄭世子華

左傳盟于洮謀王室也鄭伯乞盟請服也公王人微

者也序乎諸侯之上先王命也註時鄭伯欲與楚

不肯自來盟處其國遣使挹取其血而請與之約

束無汲汲慕中國之心故抑之使若叩頭乞盟者

也胡乞者卑遜自屈之辭欲與是盟而未知其得

與否也穀梁

春秋四傳卷五
夏狄伐晉 公穀胡無傳

左傳報采桑之役也。

秋七月禘于太廟用致夫人

穀疏左氏以夫人為哀姜。因禘祭而致之於廟。公羊

以為僖公本取楚女為嫡。取齊女為媵。齊女先至。

遂脅公使立之為夫人。故因禘祭而見於廟。此傳

及注意則以夫人為成風致之者。謂致之於太廟。

立之以為夫人。胡傳公賜季友汶陽之田及費。又生

而命之氏。俾世其卿。而私門強矣。於成風則舉大

事于始祖之廟。立以為夫人。而嫡妾亂矣。

冬十有二月丁未天王崩

公穀胡無傳

左註實以前年閏月崩。以今年十二月丁未告。

五年公及齊侯宋公陳侯衛侯鄭伯許男曹伯

會王世子于首止。說者云管仲之謀也。惠王以

后愛子帶。將廢太子鄭。管仲言于齊侯曰。君若

大惠諸侯。告于王。而請與世子會。王以天下之

歸心世子也。必無害矣。齊侯從之。會于首止。而

太子定。鄭伯惑于王命。逃歸不盟。是以齊帥諸

侯連年代鄭。八年盟洮。則鄭伯乞盟矣。左氏云

去冬閏月。惠王崩。襄王惡大叔帶之亂。懼不立。

春秋四傳新編卷五上 惠公 三六

春秋四傳卷五
不發喪而告難于齊。春盟于洮。謀王室也。襄王
定位而後發喪。夫惠王崩于七年之冬。閏八年
十二月丁未始書天王崩。且叔帶。襄王親弟也。
日在左右。父喪經年而不發。理未可信。鄭伯初
迎惠后之意。則背首止。既知襄王將立。則請盟。
洮前書。逃後書。乞皆賤之也。魯禘太廟。用致夫
人。夫人者。僖公母。成風也。公以私恩崇母。因禘
而致妾母。稱夫人。自此始矣。魯禘非禮。又成風
與祭。以妾體君。則卑其父。致于太廟。則誣其祖。
春秋于成風之存也。不可以不稱夫人。而去其

氏。其沒也。不可以不稱諡。而去其夫人。示不足
也。至矣。狄伐晉。報采桑之敗。晉猶遠。與齊未通
也。然獻公方彊。狄敢用侮。豈太子申生。縊于新
城。重耳奔翟。夷吾奔梁。國人不協。遂啓戎心歟。
是故天子諸侯貴內治也。

附錄左。二宋子魚讓太子
次。天王崩後。

僖公九年

庚襄王九年

春王正月丁丑宋公御說卒

正月公穀作三月御公穀作禦穀胡無傳

左傳宋桓公卒未葬而襄公會諸侯故曰子公不書

葬為襄公諱也

夏公會宰周公孔齊侯桓宋子襄衛侯文鄭伯文許

男僖曹伯于葵丘

左傳王使宰孔賜齊胙註宰官周采地天子三公不

字公宰猶治也三公之職號尊名也以加宰知其

職大尊重當與天子參聽萬機而下為諸侯所會

惡不勝其任也。穀疏三公論道之官兼為冢宰。通於

四海為諸侯所尊。故得出會也。胡傳宰周公者。以冢

宰兼三公也。不殊會者。非王世子貴有常尊之比。

秋七月乙酉伯姬卒。左胡無傳

左公羊穀梁曰未適人。故不稱國。已許嫁。則以成

人之禮書。不復殤也。

九月戊辰諸侯盟于葵丘

左夏會葵丘。次伯姬卒。文不相比。故重言諸侯。宰

孔先歸。不與盟。公羊桓之盟不日。此何以日。危之也。

葵丘之會。桓公震而矜之。叛者九國。穀疏桓德極而

將衰。故備日以美之。胡傳從

甲子晉侯詭諸卒。甲子無傳公作甲戌。詭左作侂。公穀胡

左甲子在戊辰之前。而書在盟後。從赴也。公不書

葬者。殺世子也。

冬晉里克殺其君之子奚齊。殺公作弑

左獻公未葬。奚齊未成君。故稱君之子。奚齊受命

繼位無罪。故里克稱君。公君冠子之上。則弑未踰

年君之號定。而坐之輕重見矣。穀疏其君之子云者。

國人不子也不正其殺申生而立之也。胡傳從

周襄王之位。齊桓公所定也。既立而錫命焉。史

記所云襄王使宰孔賜桓公彤弓矢大路是也。宰孔來而有葵丘之會。桓公合諸侯以重王命也。夏既會。九月戊辰。諸侯復盟者。宰孔已還。桓公大明王禁於諸侯也。桓盟不日。此日者。桓以天子之命行于諸侯。期會急矣。公羊氏所以疑其震矜也。桓公翊戴襄王。始于首止。中于洮。終于葵丘。王世子則殊會。宰周公則不殊會。王人下士也。序于諸侯之上。而同盟。宰周公冢宰兼三公者也。序于諸侯之上。而不敢同盟。辨上下。明尊卑。桓公誠知節哉。伯姬。魯僖公長女也。婦

人許嫁。字而笄之。死則以成人之喪治之。伯姬許嫁。未適人。而書卒。僖公恩禮其女。義與卒公子同也。宋桓公御說。賢君也。齊桓始霸。惟宋桓公一心而先諸侯。其卒也。魯必往會葬。經不書葬者。或曰。襄公迫于葵丘之會。簡父葬禮不及。致諸侯也。宋襄公背殯。貶稱子。晉襄公背殯。貶稱人。宋止出會。諸侯晉則身為戎首矣。

附錄左三。齊侯討晉亂。晉郤芮使夷吾賂秦以

殺奚。齊後。

僖公十年

辛未二年襄王十年

春王正月公如齊

皆無傳

註公月者僖公本齊所立桓公德衰見叛獨能念恩朝事之故善錄之

秋滅溫溫子奔衛

公穀胡無傳

左傳狄滅溫蘇子無信也蘇子叛王即狄又不能於狄狄人伐之王不救故滅蘇子奔衛

晉里克弑其君卓

公作卓子

左疏弑卓在前年而以今春書者從赴也獻公既葬

卓以免喪。故稱君也。胡國人不君奚齊卓子。而曰里克弑其君卓。何也。是里克君之也。

及其大夫荀息

左荀息稱名者。雖欲復言。本無遠謀。從君於昏。公

荀息不食其言。疏荀息一受君命。終身死之。故言

及。亦使上及其君。若附大國以名通。明當封為附

庸。不絕其祀。所以重社稷之臣。故云與孔父同義。

穀以尊及卑。荀息閑也。胡傳從

夏齊侯許男伐北戎。或曰齊桓不務德而勤遠畧皆無傳

晉殺其大夫里克

左里克累弑二君。故稱名以罪之。公里克弑二君。

則曷為不以討賊之辭言之。惠公之大夫也。穀稱

國以殺罪累上也。里克所為弑者。為重耳也。夷吾

曰。是又將殺我乎。故殺之。不以其罪也。胡傳同

秋七月

冬大雨雪。雪公作雹左穀胡無傳

公夫人蔽障楚女。而專取君愛。故生此雹災。

九年九月。晉獻公卒。冬十月。里克殺奚齊于次。

荀息將死之。人曰。不如立卓子而輔之。荀息立

公子卓以葬。十一月。里克殺公子卓于朝。荀息

春秋四傳圖卷五
死之。殺奚齊。書殺其君之子者。獻公未葬。奚齊未成君也。殺卓。書弑其君者。獻公既葬。卓免喪稱君也。此左氏例也。胡氏則本穀梁而爲之說。曰。奚齊書其君之子者。國人不子也。其君卓者。里克君之也。夫里克平鄭荀息。皆晉卿也。申生死。重耳夷吾奔獻公。以奚齊屬荀息。而不及里克。平者知其黨申生也。驪姬譖殺申生。奚齊幼。不預聞也。卽不當立。固君之子。非賊也。卓則驪姬弟子。奚齊死。荀息立焉。母旣無罪。次又當立。國人皆曰。吾君也。君之子不可殺。况吾君乎。春秋

于克前書殺後書弑。雖有成君不成君之恒。稱然庶孽不可爲君。一以正上新君不可累弑。一以正下義並見矣。里克平鄭欲納文公。故以三公子之徒作亂。及夷吾重賂秦以求入。則復納之。夷吾入。遂殺二子。慮其終納文公也。夫里克教申生以修己畏驪姬。而中立納文公。而不果。其人益無斷者也。平鄭則申生未死。請里克多爲之。故以變君志。夷吾旣立。說秦伯出之。而納重耳。智術勝矣。皆死于夷吾者。殺二君。其名不可居也。夷吾初殺里克平鄭。聘于秦。未敢盡殺

諸大夫後殺平鄭則神舉及七輿大夫死焉黨以次盡而務安其身夷吾可謂善殺人矣里克殺荀息書及其大夫者息不食言也且息不以奚齊死而以卓死晉既君卓能無義息乎即從君于昏君子恕之曰是宋孔父仇牧之徒異於齊高厚之徒也里克平鄭亦書大夫者夷吾恐其不利于已而殺之未嘗以弑討也春秋豈與其專殺哉温子杜云周司寇蘇公之後或云温本子爵國也北戎杜云山戎或曰別種在燕西狄北也狄滅温温子奔衛齊不能救北戎距齊

遠反役許伐之豈欲服戎以威狄歟宰孔有言齊侯不務德而勤遠畧然乎

附錄左三晉侯改葬共太子平鄭如秦次秋七月後平豹奔秦次冬大雨雪後

僖公十一年

壬襄王十有一年

春晉殺其大夫平鄭父

公羊無傳

左以私怨謀亂國。書名罪之。書春從告。穀稱國以

殺罪累上也。胡惠公以私意殺里克。故其黨皆懼。

鄭之有此謀。繇殺里克致之也。故稱國以殺。而不

去其官。

夏公及夫人姜氏會齊侯于陽穀

左公穀無傳

左婦人送迎不出門。見兄弟不踰閭。與公俱會齊

侯非禮。胡齊桓霸業怠矣。

春秋八月大雩

左公胡無傳

註左過時故書。註公公與夫人出會不恤民之應。穀雩月正也。雩得雨曰雩。不得雨曰旱。

冬楚人伐黃

公穀無傳

左黃人不歸楚貢。冬楚人伐黃。註黃人恃齊故。胡楚滅弦滅溫皆不書伐。滅黃而書伐者。罪桓公既與會盟而又不能救也。

姜氏僖公夫人聲姜也。或曰齊桓公女。或曰齊公族女。陽穀之會。許氏翰曰先乎此為大雨雪。後乎此為大雩。天之見戒也。說公羊者則以是

年八月大雩。十三年九月大雩。盡為陽穀咎。是會也。何多災乎。魯頌閟宮。頌僖公能復周公之宇也。曰魯侯燕喜。令妻壽母。聲姜魯夫人之賢者也。會齊侯于陽穀。書者為男女遠嫌也。魯亂繇二姜。春秋惡之。深痛之疾。自桓公十八年公會齊侯于濼。文姜與焉。其後曠不書。公夫人出會者五十餘年矣。忽會于陽穀。雖賢有懼十七年秋。卜之會。夫人為齊侯止。公出會以解有事而行。猶兢兢書之。是春秋之防閑也。

附錄左二

晉侯受玉惰。次殺平。鄭父後。秦晉伐戎救周。次會陽穀。後。

僖公十二年

癸襄王十四年 十有二年

春王三月庚午日有食之

皆無傳

左不書朔官失之。公是後楚滅黃。狄侵衛。

夏楚人滅黃。公羊無傳

左黃人恃諸侯之睦于齊也。不共楚職。公莊十年

冬十月齊師滅譚。十二年夏六月齊人滅遂。然則

滅例月。而此不月者。所傳聞之世。始錄夷狄滅小

國也。穀管仲死。楚伐江滅黃。桓公不能救。君子閔

之。胡書滅者。見夷狄之強。罪諸夏之弱。責方伯連

帥之不修其職

秋七月

冬十有二月丁丑陳侯杵臼卒

杵公作處皆無傳

僖公二年秋九月齊侯宋公江人黃人盟于貫

三年秋會于陽穀四年秋及江人黃人伐陳五

年楚人滅弦弦子奔黃十一年冬楚人伐黃十

二年夏滅黃春秋直書焉齊霸之盛也見于江

黃之盟其衰也見于黃之滅矣

附錄左二諸侯城衛楚丘之郭次日食後王子帶奔齊王以上卿禮饗管仲次秋七月

後月

僖公十三年

甲襄王 十有三年

春狄侵衛 左公穀無傳

胡齊桓公行荒業怠然後狄人窺伺中國

夏四月葬陳宣公 皆無傳

公會齊侯宋公陳侯衛侯鄭伯許男曹伯于鹹 公胡無傳

左夏會于鹹淮夷病杞故且謀王室也秋為戎難

故諸侯戍周齊仲孫湫致之 穀兵車之會也

秋九月大雩 皆無傳

公繇陽穀之會不恤民復會于鹹城緣陵煩擾之

應。

冬公子友如齊 皆無傳

十年春正月公如齊。說者曰魯始朝齊也。十三年冬公子友如齊。則大夫聘問之常矣。三年公子友如齊。涖盟。自是往來者勤。甯母之盟。鹹之會。皆公方會。而季友隨聘也。吾大夫正聘于齊者。始于七年。吾君朝齊者。始于十年。魯益恭而齊漸驕矣。

附錄左二齊侯使仲孫湫聘于周次。狄侵衛。後秦輸粟于晉。次公子友如齊後。

僖公十四年

乙襄王六年 十有四年

春諸侯城緣陵

左疏城緣陵不言某侯某侯。與城邢文異者。為器用

不具。城池不固而去。為會不終。故總言諸侯以譏

之。公孰城之。城杞也。曷為城。杞滅也。孰滅之。蓋徐

羊莒脅之。曷為不言徐莒脅之。為桓公諱也。註與城

衛同義。言諸侯者。時桓公德衰。待諸侯然後乃能

存之。註諸侯無小大之序。是各自欲城。無總一之

者。非霸者所制。故曰散辭。胡淮夷病杞。諸侯會于

鹹城緣陵而遷杞焉。則其事專矣。故前目後凡。直書諸侯而不序也。

夏六月季姬及鄆子遇于防使鄆子來朝鄆穀梁作

公范氏云魯女無故遠會諸侯遂得淫通此亦事

之不然左傳曰鄆季姬來寧公怒之以鄆子不朝

遇于防而使來朝此近合人情何氏以為鄆魯相

近信使洙通男女之情風流應合末世無禮容或

有之若姜氏如莒之流寧可然問也胡季姬書字

而未繫諸國其女而非婦亦明矣及者內為志內

女而外與諸侯遇譏魯也朝不言使言使非正鄆

子國君而季姬使之朝病鄆也蓋僖公鍾愛其女使自擇配故得與鄆子遇防而遂以季姬歸之爾

秋八月辛卯沙鹿崩

左傳晉卜偃日期年將有大咎幾亡國疏沙鹿實是

晉地不言晉沙鹿者凡有災害繫于所災所害之

處不繫于所屬之國故不繫晉也公土地者民之

主霸者之象也河者陰之精為下所襲者此象天

下異齊桓將卒霸道毀夷狄動宋襄承其業為楚

所敗之應穀鹿在山下平地臣象陰位也崩者散

亂背叛不事上之象疏公羊以沙鹿為河上之邑

崩者陷入地中。杜預注左氏以爲山名。此傳以鹿爲山足。是三傳說異也。胡書沙鹿崩於前。書獲晉侯於後。雖不指其事應。而事應具存。

狄侵鄭 皆無傳

冬蔡侯貽卒 左公胡無傳

公不書葬者。潰當絕也。不月者。賤其背中國而附父讐。故畧之甚也。貽立不書者。父獻舞見獲。留卒於楚。貽以次立。非篡也。穀梁意同

季姬及鄆子遇於防。使鄆子來朝也。左云鄆季姬來寧。公怒。止之。以鄆子之不朝也。夏遇于防。

而使來朝。公羊穀梁則云季姬使鄆子來請娶。已以爲夫人。胡氏疑其說。乃云僖公鍾愛其女。使自擇配。故得與鄆子遇于防。遂以季姬歸之。或又曰季姬。莊公女。必成風所出。稱字者。蓋已許嫁于鄆矣。故遇之而使來請已。繇僖公溺母愛也。然請已之說。范甯致疑。謂左氏近情。則儒者可無舍左而訟也。十三年夏公會齊侯宋公陳侯衛侯鄭伯許男曹伯于鹹。十四年春諸侯城緣陵。卽會鹹之諸侯也。公羊以爲杞國爲徐莒脅滅。故諸侯爲之城。左氏以爲淮夷病杞。故

齊桓爲之城。范注穀梁亦云緣陵杞邑。獨季氏本曰。鹹之會。爲狄侵衛也。齊衛接壤。狄當其北。三國所界之處。是爲沙鹿。緣陵蓋沙鹿間華夷雜處之地。切于齊衛。亦宋魯諸國通狄之要道也。諸侯同役城之。自此狄兵不敢犯衛者十八年。桓公安中國之志未嘗衰也。然緣陵之城。能遏狄東道入齊之衝。不越三時。狄遂繇西道以侵鄭。桓不能以兵要之。齊之霸功誠衰矣乎。

附錄左一秦乞糴于晉晉弗與次蔡侯盱卒後

僖公十五年

丙襄王十七年十有五年

春王正月公如齊 皆無傳

公註月者善公既能念恩尊事齊桓又合古五年一朝之義故錄之。

楚人伐徐 公穀胡無傳

左傳徐卽諸夏國也。

三月公會齊侯 桓宋公 襄陳侯 穆衛侯 文鄭伯 文許

男 僖曹伯 共盟于牡丘遂次于匡 公羊無傳

左傳尋葵丘之盟且救徐也。穀梁兵車之會也。遂繼事

也。次止也。有畏也。

公孫敖帥師及諸侯之大夫救徐

帥公作率後同公羊無傳

左孟穆伯帥師及諸侯之師救徐諸侯次于匡以

待之。註公言次者刺諸侯緩于人恩既約救徐而生

事止次不自往遣大夫往卒不能解也。穀善救齊

也。胡傳書盟于牡丘見諸侯救患之不協書次于匡

見霸王號令之不嚴書大夫帥師而諸侯不行見

桓德益衰而禦夷狄安中國之志怠矣。

夏五月日有食之

公穀胡無傳

左傳不書朔與日官失之也。註公是後秦獲晉侯齊桓

公卒。楚執宋公。霸道衰。中國微弱之應。穀疏不言日。

不言朔。夜食也。

秋七月齊師曹師伐厲

公穀胡無傳

註公月者善錄義兵曹稱師者桓公霸道衰曹獨能

從之征伐不義故褒之。穀疏何休以為葵丘之會桓

公震而矜之叛者九國此厲亦是叛者故伐之左

氏以為厲是楚屬國故伐厲以救徐今范與何同

葵丘著日以極美此年書月以見衰。

八月螽

公作蠖左公胡無傳

註公公父出煩擾之所生。穀梁甚則月不甚則時。

九月公至自會

左穀胡無傳

公桓公之會不致。此何以致。久也。穀莊二十七年

盟幽。傳曰桓會不致。安之也。此致者。齊桓德衰。故

危而致之。

季姬歸于鄆

皆無傳

左來寧不書。此書者。以明中絕。

巳卯晦震夷伯之廟。

穀公羊以為晦者。為晝日而晦冥。震者。雷也。謂有

雷擊夷伯之廟。此傳亦云晦冥也。震雷也。則不得

從左氏為月晦。與公羊同矣。公羊又以為夷伯者

季氏之信臣。故震其廟以戒之。今此傳歷言天子

以下廟數。以為過制。故震之。與公羊異。左氏以為

夷伯有隱慝。故天命霹靂之。亦與穀梁不同也。胡

不曰夷伯之廟震。而曰震夷伯之廟者。天應之也。

夷伯者魯大夫也。大夫既卒。不名。

冬宋人伐曹

公穀胡無傳

左討舊怨也。

楚人敗徐于婁林

公胡無傳

左徐恃救也。公謂之徐者。為滅杞不知尊先聖法

度惡重。故狄之也。不月者。畧兩夷狄也。穀夷狄相

春秋左傳卷五
敗志也。註起禍亂之原。謹兵車之始。

十有一月壬戌晉侯及秦伯戰于韓。獲晉侯。

左例得大夫曰獲。晉侯背施無親。愆諫違卜。故貶

絕下從眾臣之例。而不言以歸。疏不書敗績。晉侯

之車還。淖而被執耳。其師不大崩也。公此偏戰也。

何以不言師敗績。君獲不言師敗績也。穀梁韓之戰。

晉侯失民矣。以其民未敗而君獲也。胡傳秦伯伐晉

而經不書伐。專罪晉也。獲晉侯以歸。而經不書歸。

免秦伯也。君獲不言師敗績。君重於師也。

徐距楚遠。而近在江淮之間。楚所矚也。僖公三

年。徐人取舒。舒。楚之與國也。楚惡徐久矣。不即

伐者。以徐有諸夏之助也。葵丘以後。齊霸漸衰。

而楚人師起。既滅黃。遂伐徐。徐近于齊。楚伐之。

將震齊也。齊不可以不速救。是以有牡丘之盟。

既盟矣。而復次于匡。既次矣。諸侯又不親行。而

使大夫帥師。於是益見桓公之志怠。同盟之不

固也。厲在徐楚之間。齊又帥曹伐之。欲攻楚。救

紓徐難也。伐厲兵遣諸侯散歸。救徐不能。楚師

未退。而僖公先返矣。宋反伐曹。以修舊怨。而同

盟貳矣。諸侯兵多。久聚必爭。不與敵爭。則與盟。

春秋四傳卷五
爭宋曹之爭楚人之利也。經又書曰：楚人敗徐于婁林。齊桓合七國之兵，徘徊者幾一年，以救徐。始而以徐敗，終壯丘之盟，不如無盟矣。晉饑，秦輸之粟，秦饑，晉閉之糴。秦伯伐晉，獲晉侯，以歸。天下盡直秦而曲晉。春秋無異詞焉。

僖公十六年

丁襄王
丑八年十有六年

春王正月戊申朔隕石于宋五

隕公作實

左傳隕星也。註聞其隕，視之石，數之五，各隨其聞見

先後而記之。

是月六鷁退飛過宋都

鷁穀梁作鴈

左註是月隕石之月，重言是月，嫌同日。鷁水鳥高飛，

遇風而退。宋人以為災，告於諸侯，故書。公是月者

何，僅逮是月也，何以不日。晦日也。註王者之後有

亡徵，亦親王安存之象，故重錄為戒，記災異也。石

者陰德之專者也。鷓者鳥中之耿介者，皆有似宋襄公之行。襄欲行霸事，不納公子日夷之謀，事事耿介自用，卒以五年見執，六年終敗，如五石六鷓之數。梁穀是月者，決不日而月也。註劉向曰：石，陰類。五，陽數。象陰而陽行，將致隊落。鷓，陽也。六，陰數。象陽而陰行，必衰退。賈逵曰：齊大岳之後，石，山岳象。象齊桓卒，五公子爭，宋將治之也。程隕石于宋，自空凝結而隕，六鷓退飛，倒逆飛也。倒逆飛必有氣驅之也。春秋所書災異，皆天人響應，有致之之道。故石隕于宋而言隕石，夷伯之廟震而言震，夷伯

之廟，此天應之也。胡傳

三月壬申，公子季友卒。左無傳

左稱字，貴之。公與小斂，故書日。公其稱季友何？賢

也。穀大夫日卒，正也。稱公弟叔仲賢也。大夫不言

公子公孫，疏之也。胡春秋時魯卿有生而賜氏者，

季友仲遂是也。

夏四月丙申，鄆季姬卒。左公穀無傳

胡僖公鍾愛季姬，使自擇配。季姬不能自克，以禮

恃愛而行，雖書其卒，因奪其葬。

秋七月甲子，公孫茲卒。左公胡無傳

註公日者。僖公賢君。宜有恩禮於大夫。故皆日也。一
年喪骨肉三人。故日痛之。穀大夫日卒。正也。

冬十有二月公會齊侯宋公陳侯衛侯鄭伯許男邢
侯曹伯于淮。公胡無傳

左傳謀郟。且東畧也。註公月者。危桓公德衰。任豎刁易
牙。墮功滅項。自此始也。穀兵車之會也。

三月卒季友。夏四月卒郟季姬。秋七月卒公孫
茲。何氏云僖公賢君。痛骨肉頻死也。僖公元年
以來。季友見書于經者五。公孫茲見書者三。郟
季姬見書者三。生而禮之。死而隱之。于常卒有

加矣。

附錄左四齊伐厲不克。次郟季姬卒。後狄侵晉。
齊徵諸侯。戍周。鄭殺子華。次公孫茲。
後卒。

春秋四傳斷卷之五終

春秋四傳斷卷之五終

春秋四傳斷卷之五

明 婁東張 溥西銘學

同里張 采南郭定

魯僖公 下

戊襄王 寅九年 十有七年

春齊人徐人伐英氏 穀胡無傳

左齊人爲徐伐英氏以報婁林之役 註英氏楚與

公稱氏者春秋前黜稱氏也 註

夏滅項

左傳 淮之會公有諸侯之事未歸而取項齊人以爲

討而止公。公齊滅之不言齊滅為桓公諱也。穀桓

公知項之可滅也而不知已之不可滅也。胡滅項

者魯也。成公取鄆。襄公取邾。昭公取鄆。皆不言滅

而書取。程氏以為在君則當諱是也。若夫滅項則

僖公在會。季孫所為耳。執政之臣擅權為惡而不

與之諱。

秋夫人姜氏會齊侯于十。公穀胡無傳

左傳聲姜以公故。

九月公至自會。公穀胡無傳

左註公既見執於齊。猶以會致者。諱之。穀註桓會不致

而今致會。桓公德衰。威信不著。陳列兵車。又以滅

項往會。既非踰年。乃反。故往還皆月以危之。

冬十有二月乙亥齊侯小白卒。公胡無傳

左註與僖公八同盟。赴以名。穀此不正。其日之何也

其不正前見矣。

十六年冬公會齊侯宋公陳侯衛侯鄭伯許男

邢侯曹伯于淮。左氏云鄆為淮夷所病。謀城鄆

也。或云為徐謀楚也。然冬十二月會淮。明年春

齊人徐人伐英氏。則齊為徐謀楚之說。信諸楚

伐徐。齊桓救之不力。徒伐楚。與國之小者。厲與

英氏皆被兵焉。其師未矣。滅項。魯君臣之謀也。
僖公在淮。兵忽及項。意亦效齊桓之滅譚。遂乎。
無王命而滅小國。魯首犯禁。齊將執公以歸。正。
霸討也。夫人出會。公始反魯。是行也。賴一婦人。
以免尚歸。而告廟文於衆曰。至自會也。危矣哉。
附錄左一晉太子圉為質于秦。次伐英氏後。

僖公十八年

已襄王十年十有八年

春王正月。宋公曹伯衛人邾人伐齊。宋公下公有會字公羊無傳

左傳宋襄公以諸侯伐齊。三月齊人殺無虧。公月者註

與襄公之征齊。善錄義兵。穀梁非伐喪也。

夏師救齊。左公無傳

穀梁善救齊也。

五月戊寅。宋師及齊師戰于靡。齊師敗績。

左傳齊人將立孝公。不勝。四公子之徒。遂與宋人戰。

夏五月。宋敗齊師于靡。立孝公而還。註無虧既死。

曹衛邾先去魯亦罷歸故宋師獨與齊戰不稱宋公不親戰也。公羊戰不言伐此其言伐何宋公與伐而不與戰故言伐曷為不使齊主之與襄公之征齊也曷為與桓公死豎刁易牙爭權不葬為是故伐之也。穀梁戰不言伐客不言及言及惡宋也。程書宋及曲在宋也奉少以奪長其罪大矣齊師敗績書敗責齊臣也。胡傳同

狄救齊

左公無傳

善救齊也

胡傳同

秋八月丁亥葬齊桓公

公穀無傳

左十一月而葬亂故八月無丁亥日誤孝公立而後得葬。胡傳桓公付託非人九月而後葬見功利之在人淺矣

冬邢人狄人伐衛

狄始書人公羊無傳

左稱邢人是將卑師少者夷狄既無爵命非有君臣之別文多稱戎稱狄今君臣同文或單稱狄或稱狄人是時史異辭非褒貶也。公註狄稱人者善能救齊雖拒義兵猶有憂中國之心故進之不於救時進之者辟襄公不使義兵壅塞。穀胡意同

史記曰齊五公子各樹黨爭立桓公卒遂相攻

以故宮中空。莫敢棺。桓公尸在床六十七日。尸蟲出于戶。無虧立。乃棺赴。此甚辭也。桓公于僖十七年冬十二月卒。十八年秋八月葬。蓋國方有難。孝公立。然後成葬。聞緩葬。不聞緩殯也。易牙豎刁立公子無虧。孝公奔宋。宋襄公以諸侯伐齊。齊人殺無虧。宋立孝公還。左云桓公管仲嘗屬孝公于襄公。若然。則宋納孝公。正矣。春秋何惡焉。齊桓五子。太子未定。無虧與孝公未知其孰當立也。無虧以寺人立。孝公以宋立。與其黜孝公也。寧黜無虧。然宋公與曹伯衛人邾人。

伐齊。春秋抑伐者。申救者。非獨善魯救也。狄救亦善之。狄救齊。善矣。卽與邢伐衛。亦善之。善在狄。貶在中國。君子曰。宋襄公無道之君也。非能繼齊霸者也。旣不許其繼齊霸。卽不許其定齊亂。亂之戰。宋敗齊師。立孝公。能定亂矣。春秋奪之。又褒魯進狄。以示譏焉。曰。無虧長也。孝公少也。立君以長。不以少。賞伯以實。不以名。是故舍易牙豎刁。而專治宋襄也。

附錄左二。鄭伯始朝于楚。次伐齊後。秦取梁。伯新里。次伐衛後。

僖公十九年

唐襄王十一年 十有九年

春王三月宋人執滕子嬰齊

公穀無傳

左疏宋人執滕子。邾人執郕子。二君於傳無不道之

狀而皆稱人以執。是宋公欲重其罪。以罪及民告

故史從而書之。以示虛實。或名或不名。從所告之

文也。註公名者。著葵丘之會。叛天子命者也。胡滕子

書名。著其罪也。宋稱人。惡其專也。

夏六月宋公曹人邾人盟于曹南

公作宋人皆無傳

左註曹雖與盟而猶不服。不肯致餼。無地主之禮。故

不以國地而曰曹南。所以及秋而見圍。公言此盟之前。相與于曹南矣。其實此盟在邾婁。故言實邾婁矣。

鄆子會盟于邾 穀胡無傳

左不及曹南之盟。諸侯既罷。鄆乃會之于邾。故不言如會。公魯本許嫁季姬于邾婁。季姬淫泆。使鄆子請已而許之。二國交忿。襄公為此盟。欲和解之。既在會間。反為邾婁所欺。執用鄆子。耻辱加于宋無異。故沒襄公。使若微者也。

已酉邾人執鄆子用之 胡無傳

左昭十一年楚執蔡世子友用之。與此執鄆子用之。皆惡其無道。直書用之。言其若用畜牲。所以惡楚宋也。惡宋而以邾自用為文者。南面之君。善惡自專。不得託之他命。事實惡宋。亦所以惡邾也。傳稱用之于社。而經不書于社。赴不及也。公叩其鼻以血社。公不言社者。本無用人之道。言用之已重矣。故絕其所用處也。日者。魯不能防正其女。以至于此。明其痛其女禍而自責之。

秋宋人圍曹 公穀無傳

左討不服也。子魚言于宋公曰。盍姑內省德乎。無

闕而後動。胡襄公執嬰齊非伯討不足以示威。盟曹南非同志不足以示信。卒于外欺身傷不知反求諸已欲速見小利之過也。

衛人伐邢

公穀胡無傳

左傳報菟圃之役

冬會陳人蔡人楚人鄭人盟于齊

公作公會楚始與齊盟公穀無傳

左傳陳穆公請修好于諸侯以無忘齊桓之德冬盟

于齊修桓公之好也。註地于齊齊亦與盟公因宋

征齊有隙而為此盟也是後楚遂得中國霍之會

執宋公。疏齊蓋構會諸侯為此盟以謀宋矣。註會

無主名內卑者也。四國稱人外卑者也。胡傳曷為內

則沒公外則人諸侯與其大夫諱是盟也。楚人之得與中國會盟自此始也。

梁亡

左傳梁伯好土功溝公宮秦遂取梁梁亡不書其主

自取之也。註公梁君隆刑峻法一家犯罪四家坐之

百姓一旦相率俱去狀若魚爛從內發。穀疏仲尼修

春秋亦有改舊義以見褒貶者亦有因史成文以

示善惡者其變之也不莖有三為齊桓諱滅項之

類是改舊也其梁以自滅為文鄭棄其師之徒是

因史之文也。胡傳意與三傳同

甚哉宋襄公之求伯急也。伐齊之役，滕子不與。則執之。曹南之盟，鄆子後會，則使邾人執而用之。曹伯雖盟而不修地主之禮，則圍之。執之圍之，暴矣。用則取國君之血，若畜牲，然是桀宋也。諸侯惡宋襄之虐，則思齊桓之德。陳蔡爲楚致魯，乃盟于齊，是故齊之盟魯及諸侯，盟楚之始也。鹿上之盟，外諸侯，盟楚之始也。齊桓之伯，則攘楚，宋襄之伯，則啓楚，襄固桓之罪人，何以伯爲。僖十八年冬，邢人狄人伐衛，其稱名也。以衛從宋而伐齊也。狄主之，邢輔之。春秋首邢者，不

以夷狄先中國也。十九年，衛人伐邢，報前役也。然不伐狄而伐邢，師則卑矣。左云衛大旱，討邢而雨，妄也。晉人執虞公，虞自滅也。梁亡，梁自亡也。虞滅于貪，梁亡于虐。春秋不暇罪秦晉而罪亡國之君，用是爲君戒矣。

附錄左一秦城新里次
十九年春後

僖公二十年

辛襄王十二年二十年

春新作南門

左疏魯城南面三門。隱公元年開一門。故今南有四

門。僖公意更繕治高大稷門。非啓塞之義。而以日

至之後興功。故經書春。傳曰書不時。言失土功之

時也。啓塞之事。猶得從宜而修之。公註惡奢泰。不奉

古制常法。穀梁作爲也。有如其度也。言新有故也。非

作也。南門者。法門也。胡傳譏用民力於所不當爲也。

夏郟子來朝 左胡無傳

公郟子者何。失地之君也。何以不名。兄弟辭也。

五月乙巳西宮災。左胡無傳

左西宮。公別宮也。公西宮。小寢也。有西宮。則有東

宮矣。註是時僖公為齊所脅。以齊媵為適。楚女廢

在西宮而不見恤。悲愁怨曠之所生也。穀若是禰

宮。當言新宮。若是疏祖之宮。又須言謚。此在親疎

之間。故知是閔公也。

鄭人入滑。公穀胡無傳

左滑人叛鄭而服於衛。夏鄭公子士洩堵寇帥師

入滑。

秋齊人狄人盟于邢。胡無傳

左為邢謀衛難也。公狄稱人者。能常與中國也。穀

邢為主焉爾。邢小其為主何也。其為主乎救齊。

冬楚人伐隨。公胡無傳

左隨之見伐不量力也。

南非一門。或曰三門。或曰四門。不言何門。書南

門者。凡南之門加度也。言新見有舊。言作則非

因。一時而南門畢役。且加度焉。繁土工。譏得已

也。郟子。南郟也。郟有二。桓二年取郟。大鼎者。北

郟也。公羊疑是北郟。故云失地之君。此滅在春

春秋前。豈能復行朝禮。修兄弟辭乎。西宮。三宮之一。禮。夫人居中宮。西宮者妾媵之居。其書儆房室也。鄭人入滑。甚鄭之無忌也。幽之盟。鄭與滑實同。桓歿未几。鄭首從楚。遣二卿稱兵。故人之賤。鄭伯書入。志鄭凌滑。驅師其地。爾盟于邢。曰。爲謀衛。然齊固霸。復何以並狄。稱人。君子曰。齊孝之無知。厥父攘夷。厥子盟楚于國。厥父攘狄。厥子盟狄于邢。齊人狄人。復何辨。隨近楚。楚欲得志於漢東。日隨是謀。茲蔑中國無霸。敢伐隨。左氏乃責隨不量力。則爲隨計。將率漢陽諸姬。

一聽楚命歟。又一鄭伯矣。故書伐隨。明隨能自立。致楚伐也。書楚人伐隨。危楚人復猾我中國。

也。采補

僖公二十一年

壬襄王十三年二十有一年

春秋侵衛 皆無傳

左為邢故 公貶狄者為犯中國諱

宋人齊人楚人盟于鹿上 公穀胡無傳

左宋人為鹿上之盟以求諸侯于楚楚人許之

夏大旱 胡無傳

左雩不獲雨故書旱自夏及秋五稼皆不收 公新

作南門之所生 穀早必歷時非一月之事故書時

為正

秋宋公楚子陳侯蔡侯鄭伯許男曹伯會于孟執宋公以伐宋

左楚始與中國行會禮。故稱爵。不言楚執宋公者。

宋無德而爭盟為諸侯所疾。故總見眾國共執之。

文。公曷為不言楚子執之。不與夷狄之執中國也。

穀疏以有二義。執宋公及執衛結皆是國之所重也。

其微人從伐者。即云以者不以者也。程宋率諸侯

為會。而蠻夷執會主。諸侯莫違。故以同執書之。胡

從之。公穀胡無傳

冬公伐邾

左為邾滅須句故。

楚人使宜申來獻捷

左不言宋者。秋伐宋。冬來獻捷。事不異年。從可知。

不稱楚子。使來不稱君命行禮。公楚子也。其稱人

何。為執宋公貶。不言捷乎宋。為襄公諱也。不言圍。

為公子目夷諱也。註獻捷書者。罪魯受惡人物也。

穀不曰宋捷。不與楚捷于宋也。胡不曰來獻宋捷

為魯諱也。

十有二月癸丑公會諸侯盟于薄釋宋公

公善僖公能與楚議釋賢者之厄。不言公釋之者。

諸侯亦有力也。疏不書楚子釋宋公者。何氏廢疾
公羊以爲公會諸侯釋之。故不復出楚耳。穀不言
楚不與楚專釋也。胡言會書盟書釋皆不言楚子
爲魯諱也。

鹿上之盟。宋求諸侯于楚也。孟之會。楚與諸侯
會宋也。方會而執宋公。其楚志歟。諸侯之志歟。
公羊云。宋公與楚子期以乘車之會。公子目夷
諫曰。楚夷國也。疆而無義。請君以兵車之會往。
宋公曰。不可。吾與之約以乘車之會。自我爲之。
自我墮之。曰。不可。終以乘車之會往。楚人果伏

兵車。執宋公以伐宋。是孟之會。楚先定。執宋之
謀而後會也。蠻夷無親。要盟不信。盟于鹿上。齊
人在焉。宋猶有恃。會于孟。齊人疑而不至。宋公
獨往。陳蔡鄭許皆楚之黨。曹又宋仇也。楚與五
國執宋。公魯公雖在會。弗能救也。楚人使宜申
來獻捷。將以威魯。魯畏而不拒。踰月。公會諸
侯于薄。釋宋公。魯豈能釋宋公。釋宋公者亦楚
謀也。宋當東諸侯之中。天下之要處也。楚得宋
而天下可圖矣。旣執宋公而復釋者。何蓋楚方
會中國諸侯未盡服從。卽殺宋公。宋未可卽滅。

姑假魯以釋之。是楚之狡也。楚之于宋公也。欲執則執之。欲釋則釋之。魯共命而已。春秋分惡于五國而重諱于我公。非薄楚罪哀無伯也。

僖公二十二年

癸未襄王二十二年

春公伐邾取須句

句公作响公穀無傳

左傳反其君焉。禮也。胡傳書取者擅也。

夏宋公衛侯許男滕子伐鄭

公穀胡無傳

左註怒鄭至楚故伐之。

八月丁未及邾人戰于升陘

公羊無傳

左註邾人縣公胄于魚門故深耻之不言公又不言

師敗績。穀梁內諱敗舉其可道者也不言其人。以吾

敗也不言及之者為內諱也。胡傳魯既敗績邾亦幾

亡。輕用師徒害及兩國。

冬十有一月己巳朔宋公及楚人戰于泓宋師敗績

左註宋伐鄭楚救之故戰也楚告命不以主帥人數

故畧稱人公偏戰者日爾此其言朔何正也君子

大其不鼓不成列雖文王之戰亦不過此也穀老

子至道之人猶日以正治國以奇用兵今宋襄困

弱于楚而行敵戰之禮故傳譏其師敗身傷註謂

之不識至道之術也胡傳宋公言及深貶之也

宋司馬子魚于襄公之執滕子用鄫子也曰一

會而虐二國之君求伯難乎于圍曹也曰君德

有闕而伐人若何于盟鹿上也曰小國爭盟禍

也于會孟也曰禍在此乎于薄之釋也曰禍猶

未也于伐鄭也曰禍在此矣襄公之行皆敗道

也泓之戰則曰不鼓不成列又違子魚之言而

敗子魚仁而智襄公不仁而愚胡氏責其三罪

穀梁子先之矣鄭附楚楚伐宋義皆當貶春秋

後之者以興兵自宋也二十一年冬公伐邾爲

邾人滅須句須句子奔魯公母成風爲之請討

也明年春公伐邾取須句反其君焉由左氏之

言邾有滅國之罪魯有繼絕之仁再書伐邾重

罪邾也。升陘之戰，公卑邾而敗，縣胄之耻沒而不書，不使無義之小國加乎大國也。豈獨爲內諱乎。

附錄左四辛有適伊川，晉太子圉自秦逃歸，王子帶歸京師，次宋伐鄭，後楚子取鄭二姬，次宋師敗績後。

僖公二十三年

甲襄王二十有三年
申五年

春齊侯伐宋圍緡

緡穀作閔後同

左十九年盟于齊，以無忘桓公之德，而宋獨不會。

復召齊人共盟鹿上，故今討之。公襄公欲行，伯

正履信，屬爲楚所敗，諸夏之君宜雜然助之，反因

其痛而伐之，痛與重故創無異，故言圍以惡其不

仁也。穀言圍不正其以惡報惡也。胡傳意

夏五月庚寅宋公茲父卒

胡無傳

左傷於泓故也。公襄公本以背殯，不書其父葬，故

復使身不書葬。穀梁茲父之不葬失民也。

秋楚人伐陳

左傳討其貳于宋也。疏傳稱楚成得臣帥師伐陳則

是楚之貴卿也。而稱人者楚不以得臣名告。

冬十有一月杞子卒

公穀無傳

左註不書名未同盟也。杞入春秋稱侯莊二十七年

繼稱伯至此用夷禮。貶稱子。公註卒者桓公存王者

後功尤美故為表異。卒錄之始見稱伯。卒獨稱子

者微弱為徐莒所脅不能死位。胡傳從左

齊孝公。宋襄公所立也。又有鹿上之盟。今乘其

敗于楚而伐之。且會孟不來盟。薄不與執宋公

而齊坐視。釋宋公而齊無力其負宋多矣。或謂

孝公不肯下楚。欲繼桓餘烈。親伐宋以報伐喪

之怨。然宋伐喪即不順于孝公。不可謂無德也。

齊不仇。猶夏之楚而仇立已之宋。不伐宋于爭

盟之時而伐宋于敗泓之後。春秋所以圍伐並

書重絕其惡也。齊桓公自魯莊公九年入國。十

三年始伯。迄僖公十七年卒。凡伯者三十九年。

宋襄公立于僖公九年。十八年始稱伯。迄二十

三年卒。即伯僅六年耳。襄公未伯以前五石六

鷓。災。異。先。見。既。稱。伯。國。尤。不。寧。會。孟。而。執。敗。泓。而。卒。威。行。滕。鄆。不。蔽。楚。怨。易。之。鼎。之。九。四。曰。鼎。折。足。覆。公。餗。其。行。渥。凶。言。力。小。而。任。重。也。詩。有。狡。童。揚。之。水。二。篇。刺。鄭。忽。無。忠。臣。良。士。終。以。死。亡。也。說。春。秋。者。取。以。况。宋。襄。誠。然。然。宋。有。一。子。魚。襄。公。不。能。用。卽。死。也。猶。有。憾。

附錄左二晉懷公殺狐突次楚伐陳後楚送晉重耳于秦次杞了卒後

僖公二十四年

乙襄王十
酉六年二十有四年

春王正月

夏狄伐鄭

左傳王使顏叔桃子出狄師夏狄伐鄭取櫟王德狄人將以其女為后富辰諫不聽

秋七月

冬天王出居于鄭

左註天子以天下為家故所在稱居天子無外而書出者譏王蔽于匹夫之孝不顧天下之重因其辟

母弟之難。書出言其自絕于周。公疏天子不事其母。

而自出居于鄭。春秋惡其所為。書出以絕之。實非

出奔。梁穀天子無出。出失天下也。居者居其所也。雖

失天下。莫敢有也。胡傳自周無出。特書出者。言其自

取之也。

晉侯夷吾卒 皆無傳

左註晉文定位而後告惠公之喪。故書于今年。公纂註

故不書葬。明當絕也。不日月者。失衆身死。子見篡

逐。故畧之。猶薛伯定也。

王啓狄師。不言王以爲天王諱也。鄭執王使。豈

有怨辭。然時雖無霸。聲罪于諸侯。可張天討。乃

使狄得志。是無中國也。故書狄伐鄭。見鄭無王。

狄得伐之。亦見王自無中國。不以王加鄭。則伐

鄭者狄爾。天子無外。不言出。茲天王以內難播

越。故書。然前此惠王嘗適鄭。處於櫟。何以不書。

五大夫之釁。王之作孽。猶可追則諱之。今所以

播越。崇姦卽禍。富辰一再諫。王終弗聽。方召狄

伐鄭。叔帶卽以狄攻王。王實階亂。又將誰懟。則

奪其無外而書出。王者至尊。故出不曰奔。天子

無客禮。莫敢爲主。故所至稱居。天子所在。諸侯

春秋四傳卷五
三
不敢有其土。故越在鄭地。汜不書汜。公羊謂不能于母。失其事矣。晉侯夷吾惠公爾。卒在去年九月。此乃書文公位定始告。從告。史法也。采補

僖公二十五年

丙襄王十七年二十有五年

春王正月丙午衛侯燬滅邢

左衛邢同姬姓。惡其親親相滅。故稱名罪之。
胡意

夏四月癸酉衛侯燬卒 皆無傳

宋蕩伯姬來逆婦 左無傳

左伯姬魯女。為宋大夫蕩氏妻也。自為其子來逆。稱婦。姑存之辭。婦人赴竟迎婦。非禮。故書。
註公宋魯之間。名結婚姻為兄弟。
胡伯姬配蕩氏。其往嫁不

見于經者。國君不與大夫敵也。今來逆婦。而史策書之。見公失禮。下主大夫之昏。

宋殺其大夫

左胡無傳

公何以不名。宋三世無大夫。三世內娶也。註謂慈

父王臣處曰也。內娶大夫女也。禮不臣妻之父母。絕去大夫名。正其義也。宋以內娶故公族以弱。妃黨益彊。威權下流。政分三門。卒生篡弑。親親出奔。疾其末。故正其本。穀梁其不稱名姓。以其在祖之位尊之也。註孔子之祖孔父累于宋。殤公而死。今骨肉在其位而見殺。故尊之。隱而不忍稱名氏。

秋楚人圍陳納頓子于頓

左頓迫于陳而出奔楚。故楚圍陳以納頓子。不言

遂。時一事也。子玉稱人。從告。頓子不言歸。與師見

納故。公何以不言遂。兩之也。註別之者。惡國家不

重民命。一出兵為兩事也。穀梁納者。內弗受也。圍一

事也。納一事也。而遂言之。蓋納頓子者。陳也。註圍

陳使納頓子。胡陳先代之後。不能以禮安靖鄰國。

保恤寡小。中國諸侯。又不能修方伯連率之職。而

使楚人納之。是夷狄仗義正諸夏也。故書曰楚人

圍陳。納頓子于頓。其責中國深矣。

春秋四傳卷五
葬衛文公

皆無傳

公不月者。滅同姓。故奪臣子恩也。

冬十有二月癸亥公會衛子莒慶盟于洮

公胡無傳

左衛文公既葬。成公不稱爵者。述父之志。降名從

未成君。故書子以善之。莒慶不稱氏。未賜族。

公莒

無大夫。書莒慶者。尊敬壻之義也。洮內地。公與未

踰年君大夫盟。不別得意。雖在外。猶不致也。

穀小

國無大夫。以公與會。故進之。時有衛子。則無敵公之嫌。

十八年春。宋公曹伯衛人邾人伐齊。冬。邢人狄

人伐衛。十九年秋。衛人伐邢。二十年秋。齊人狄

人盟于邢。二十一年春。狄侵衛。衛邢之爭久矣。

邢又附狄。以難衛。菟圃之役。衛侯以國讓父兄

子弟。及朝。衆曰。苟能治之。燬請從焉。衆不可而

後。師于訾婁。狄師還。衛憤二國誠深。狄強邢弱

不能得志于狄。則先滅邢。春秋胡爲罪之。齊桓

興伯救邢存衛。爲德于中國之大者也。桓公方

卒。衛從宋伐齊。爲負德首。邢助狄伐之。邢小國

也。誠不自量其力。抑以救齊爲名。近知義矣。衛

不自省過。舍狄伐邢。又使禮至昆弟。往仕以窺

其間掖殺國子。衛遂滅邢。春秋惡滅同姓。未有如衛滅邢之譎。且忍者也。故書名以著罪焉。宋襄公敗于楚而卒。衛文公方滅邢而亦卒。嗚呼。人死而無能也。宋公之卒。衛侯之卒。予不知烏之雌雄也。二十三年秋。楚人伐陳。左氏云討其貳于宋也。儒者疑曰。曹南之盟。伐鄭之役。陳不從宋。盟齊會孟。執宋公。伐宋。則陳從楚。陳服楚者也。非貳於宋者也。楚伐之何居。蓋頓在陳南。陳所屬也。後役於楚。陳猶責禮焉。頓人訴楚。楚乃伐陳。取焦夷。城頓而還。二十五年圍陳。納頓。

子于頓。天下莫不曰陳虐頓。子楚人納之時。無伯矣。倒授蠻夷以柄。是故衛滅邢而無罪。楚納頓而有功矣。

附錄左四晉侯辭秦師。王入王城。殺太叔。次。後殺大夫。後晉文圍原。次。塋衛文公。後勃鞞舉趙衰守原。次盟洮。後。

僖公二十六年

丁襄王十一年
亥八年二十有六年

春王正月己未公會莒子衛甯速盟于向速公作漱
後同公胡

無傳

左傳尋洮之盟也。穀梁公不會大夫其曰甯速何也。以

其隨莒子可以言會也。

齊人侵我西部公追齊師至鄆弗及鄆公穀作雋弗
左作不

左疏齊人侵我討洮向二盟言至鄆者美公遠追能

遠至齊地。公註言師者侈大公所追也。穀疏莊十八年

公追戎于濟西傳稱不使戎邇于我也今舉齊侵

是以難近國而亦云大之也者。彼以戎有徒衆。故大公所追。此以公之不及。故亦言大之也。然彼不言戎之伐我。此云齊人侵我者。彼是戎狄。不使之近我。似若望風退走。然此齊是中國。侵又淺事。故舉之以見公追非正也。胡傳書人書侵書師。罪齊也。書追書至鄆弗及。罪魯也。

夏齊人伐我北鄙

左傳孝公未入魯境。先使微者伐之。

衛人伐齊

左傳齊孝公伐我北鄙。衛人伐齊。洮之盟故也。公使

展喜犒師。齊侯乃還。東門襄仲臧文仲如楚。乞師。臧孫見子玉。而道之伐齊宋。以其不臣也。疏乞者。

執謙之意。不保必得之辭。公羊乞者何。卑辭也。曷爲

外內同若辭。重師也。曷爲重師。師出不正反。戰不

正勝也。穀梁乞重辭也。何重焉。重人之師也。非所乞

也。胡傳公乞楚師。與齊爲敵。是以蠻夷殘中國也。

秋楚人滅夔。以夔子歸。

夔公羊作隗。公羊無傳。

左傳夔。楚同姓。夔有不祀之罪。故不譏楚滅同姓。公

不月者。畧夷狄滅微國也。不言獲者。舉滅爲重。書以歸者。惡不死位。不名者。所傳聞世。見治始起責。

小國畧。但絕不誅之。穀夔國也。不日。微國也。以歸。

猶愈乎執也。胡諸侯之祀。無過其祖者。而夔祖熊

摯。是不得祀。祝融與鬻熊也。而楚反以是滅之。非

其罪矣。故特存其爵而不名也。

冬楚人伐宋圍緡

緡穀作閔胡無傳

左宋以其善于晉侯也。叛楚即晉。冬楚令尹子玉

司馬子西帥師伐宋。圍緡。公楚人出師為魯伐齊。

而中道以伐宋。故伐圍兼書。所以責楚。穀梁同

公以楚師伐齊取穀

公胡無傳

左凡師能左右之曰以。寘桓公子雍于穀。易牙奉

之以為魯援。楚申公叔侯戍之。桓公之子七人為

七大夫于楚。穀兵不祥之器。不得已而用之。安有

驅民于死地以共假借之役乎。

公至自伐齊

左無傳

公魯內虛而外乞師。以犯強齊。會齊侯昭卒。晉文

行霸。幸而得免。故雖得意。猶致伐也。穀以蠻夷之

師。伐隣近大國。招禍深怨。危亡之道。胡傳

僖公元年。公子友敗莒師于鄆。獲莒拏。自是莒

未嘗與魯盟。衛文公欲平之。未及而卒。成公斬

然衰經之中。為洮之盟。平莒于我。追成父志也。

然莒子不至。以慶如會。明年盟于向。始自至者。蓋初盟于洮。平之意出于衛。莒疑魯未肯。卽平故先使慶來知魯。果欲平而後親行。非浮來之比。妄以大夫盟君也。盟洮言衛子者。成公親與盟也。盟向言衛甯速者。成公在喪不再行。而使大夫也。二盟未幾。齊人侵我西鄙。伐我北鄙者。何時。齊桓雖卒。孝公尚以盟主自命。三國盟而不告。興師侵伐。若以私盟討魯。然春秋惡其無名矣。是以公追齊師。衛人伐齊。傳皆無貶。然齊師之來。公追之可也。至鄆弗及可也。衛人助魯

伐之可也。奈何齊侯已還。襄仲復出。反乞師于楚。背夏卽夷。魯爲禍首。罪莫大焉。臧孫旣道楚。伐齊。又道楚伐宋。知楚宋怨偶也。于是楚人伐宋。圍緡。公以楚師伐齊。取穀。以周公之胤宗國之長。借兵蠻夷。僅一得意。國君之大辱。生民之至憂也。猶歸而飲。至危乎其至也。一僖公也。先任公子友。而智晚任公子遂。而愚其始也。從齊伐楚。頌于詩曰。公車千乘。公徒三萬。戎狄是膺。荆舒是懲。其終也。以楚伐齊。春秋書曰。公子遂如楚。乞師。悲哉。二十五年。楚人圍陳。納頓子于

頓名存頓也。二十六年滅夔。以夔子歸。則滅同姓矣。既滅同姓。又爲之辭曰。責其不祀。祝融與鬻熊。夫夔祖熊摯。禮無遠祀。而傳者不詳。遂以楚爲正。楚納頓子。實侵陳也。而有存亡之名。滅夔。實滅同姓也。而反加人以不祀之罪。其操術詭矣。或曰。洮之盟。公致衛莒。以從楚也。盟于向。堅之也。夫二盟也。固衛平魯。莒非魯。爲楚說。春秋者。見乞師之役。遂兼二盟而疑之。君子惡居下流。有以夫。

僖公二十七年

戊襄王二十九年二十有七年

春杞子來朝

公穀胡無傳

左傳杞桓公來朝。用夷禮。故曰子。公卑杞。杞不共也。
公疏杞本公爵。但春秋欲新周。故宋而黜之。稱伯。莊二十七年。杞伯來朝。是也。二十三年。杞子卒者。以微弱爲邾莒所脅。不能死位。故以其一等貶之。見聖人子孫。有誅無絕而已。至此復稱子者。起其無禮不備。故魯入之也。

夏六月庚寅齊侯昭卒

公穀胡無傳

左有齊怨。不廢喪紀。禮也。

秋八月乙未葬齊孝公。皆無傳

左三月而葬速。

乙巳公子遂帥師入杞。公穀胡無傳

左責無禮也。註乙巳九月六日。公杞屬脩禮朝魯。

雖無禮。君子躬自厚而薄責于人。不當入之。故書

日責之。

冬楚人陳侯蔡侯鄭伯許男圍宋

左諸侯之貶不至稱人。今言楚人。不得為楚子之

身也。子玉。楚之正卿。宜書其名。今書曰楚人。非子

玉也。故以耻不得志。以微者告也。春秋之例。會同

以國大小為序。征伐則以主兵在前。此序諸侯之

上。繇楚主兵故也。公楚子稱人。為執宋公故。終僖

之篇貶也。穀人楚子。所以人諸侯也。不正其信夷

狄而伐中國也。胡傳

十有二月甲戌公會諸侯盟于宋。左公穀無傳

穀杜氏之意。公會諸侯盟于宋。宋不與盟。何休與

范皆云地以宋。則宋得與盟。二傳以無晉救宋之

文。故與左氏異也。胡公與楚結好。故往會盟。其地

以宋者。宋方見圍。无嫌于與盟。而公之罪亦著矣

杞自成公避貢賦。貶爵稱子。今猶用子禮朝。則子之。然我甥舅。伯姬固在。卽不共。當念親好。乃使上卿加兵。名曰責無禮。往者二十三年。杞子卒。未見魯一介脩弔葬。已則無禮而責人。如謂小弱宜事大。倘齊楚尤而效。魯又將曷供。春秋惡之。故入杞書曰。楚人爭伯。魯與曹衛陳蔡鄭許皆從。宋懷厥父讎。弗南服。楚遂合諸侯圍宋。然獨陳蔡鄭許者。楚道所繇。且留曹衛以遏晉。留魯以遏齊。其困宋云狡矣。穀梁子曰。人楚子。所以人諸侯。然曷不入諸侯。惟曰陳侯蔡侯鄭

伯許男寔從。楚人圍宋。則益著。公會諸侯盟于宋。不言會楚人。此固圍宋之諸侯。則已會楚人矣。詩稱公荆舒是懲。齊桓旣沒。惟楚之勤。安在其能懲乎。宋不與盟。岌乎其殆。此天所以開晉

文也。采補

僖公二十八年

巳襄王二十八年

春晉侯侵曹晉侯伐衛

左再舉晉侯者曹衛兩來告。註公曹有罪晉文行霸

征之衛壅遏不得使義兵以時進故著言侵曹以

致其意所以通賢者之心不使壅塞也宋襄公伐

齊月此不月者晉文公功信未著且當脩文德未

當深求于諸侯故不美也。註穀曹衛並有宿怨于晉

君子不念舊惡故再稱晉侯以刺之。胡傳

公子買戍衛不卒戍刺之

左周禮司刺掌三刺之法以贊司寇聽獄訟此及
成十六年刺公子偃皆書刺者魯史獨設此名所
以異于外也公羊以為內諱殺大夫謂之刺以為
諸侯不得專殺故諱言刺之其意小異公實畏晉
殺子叢以說晉言戍衛者叢之所為又歸罪于叢
言不終戍事故殺之恐不為遠近所信故顯書子
叢之罪也穀先名後刺殺有罪也胡刺未有書其
故者而以不卒刺之則知買為無罪矣

楚人救衛

皆無傳

三月丙午晉侯入曹執曹伯畀宋人

左執諸侯當以歸京師晉欲怒楚使戰故以與宋
所謂譎而不正公畀者與使聽之也註與使聽其

獄也時天王居于鄭晉文欲討楚師以宋王者之
後法度所存故因假使治之宋稱人者明聽訟必
師斷與其師眾共之穀入者內弗受也日入惡入
者也以晉侯而斥執曹伯惡晉侯也畀與也其曰
人何也不以晉侯畀宋公也註畀上與下之辭故

不以侯畀公

胡傳意
同左

夏四月己巳晉侯齊師宋師秦師及楚人戰于城濮
楚師敗績

左宋公齊國歸父秦小子憖既次城濮以師屬晉不與戰也子玉及陳蔡之師不書耻敗告文略也

公此大戰也曷為使微者子玉得臣也其稱人何羊貶曷為貶大夫不敵君也註臣無敵君戰之義故

絕之也秦稱師者助伯者征伐有功故褒進之齊桓先朝天子晉文先討夷狄者晉文之時楚與爭

疆所遭遇異胡楚稱人貶也戰而言及主乎是戰者也楚雖請戰而及在晉侯誅其意也

楚殺其大夫得臣楚始書大夫公穀無傳
左子玉違其君命以取敗稱君以殺罪之公不氏註

者子玉得臣楚之驕蹇臣數道其君侵中國故貶明當與君俱昭也胡責楚子比之鄭棄其師

衛侯出奔楚公穀無傳
左傳衛侯聞楚師敗懼出奔楚遂適陳使元咺奉叔

武以受盟公晉文逐之不書逐之者以王事逐之

擇立其次無絕衛之心惡不如出奔重胡諸侯失國出奔未有不名者衛侯何以不名著文公之罪也

五月癸丑公會晉侯齊侯宋公蔡侯鄭伯衛子莒子

盟于踐土公羊無傳

左 踐土鄭地。王子虎臨盟。不同軟。故不書。衛侯出
奔。其弟叔武攝位受盟。非王命所加。從未成君之
禮。故稱子。而序鄭伯之下。經書癸丑。月十八日也。
傳書癸亥。月二十八日。經傳必有誤。註公盟日者。譎
也。衛稱子者。起叔武本無卽位之意。註穀實會天王。
而文不言天王。若諸侯自共盟然。是諱之也。所謂
譎而不正。傳胡天王下勞晉侯于踐土。則削而不書。
去其實以全名。所謂君道也。父道也。晉侯以臣召
君。則書天王狩于河陽。正其名以統實。所謂臣道
也。子道也。衛侯奔楚。不書名者。未絕其位也。叔武

受盟而稱衛子者。立以爲君也。

陳侯如會

左胡無傳

左陳本與楚。楚敗懼而屬晉。來不及盟。故曰如會。
註公說與會伐宋同。刺諸侯不慕霸者。反岐意于楚。
失信後會。會不致者。安信與晉文也。註穀外乎會。不
及序也。受命于會。故曰如會。

公朝于王所

左無傳

左王在踐土。非京師。故曰王所。註公臣無召君之義。
故不言王之所在。穀朝不言所。言所非其所也。傳胡
天子在是。而諸侯就朝禮之變也。春秋不以諸侯

就朝為非。而以王所非其所為。貶正其本也。

六月衛侯鄭自楚復歸于衛。公羊無傳

左復其位曰復歸。晉人感叔武之賢而復衛侯。衛

侯之入。繇于叔武。故以國逆為文。公言復歸者。天

子有命歸之名者。刺天子歸有罪也。言自楚者。為

天子諱也。穀復者。復中國也。歸者。歸其所也。鄭之

名失國也。註以鄭非大罪。故出奔不名。惡其藉楚

之力。故入名以表失國。胡衛侯失國出奔。則不名。

復歸得國。何以名。殺叔武也。

衛元咺出奔晉。公穀無傳

左書官及氏為貴。則書名。不是賢文。以元咺訴君于晉。所訴雖直。令君陷罪。失君臣之節。故無賢文。

陳侯欵卒。皆無傳

公不書葬者。為晉文諱。行霸不務教人以孝。陳有大喪而強會其孤。故深為耻之。

秋杞伯姬來。皆無傳

左莊公女歸寧曰來

公子遂如齊。皆無傳

左聘也。

冬公會晉侯齊侯宋公蔡侯鄭伯陳子莒子邾婁子

秦人于溫

晉侯下穀無齊侯
羊無傳

秦與中國會始此公

左討衛許。穀諱會天王也。註陳稱子在喪也。

天王狩于河陽

狩穀作守

左傳是會也。晉侯召王以諸侯見。且使王狩。仲尼曰

以臣召君。不可以訓。故書曰天王狩于河陽。言非

其地也。且明德也。公狩不書。此何以書。不與再致

天子也。曾子曰溫近而踐土遠也。穀天王守于河

陽。全天王之行也。為將若守而遇諸侯之朝也。為

天王諱也。水北為陽。山南為陽。溫河陽也。胡天王

狩于河陽。尊周而全晉也。

壬申公朝于王所

胡無傳

左壬申十月十日。有日而無月。史闕文。公危錄內

再失禮。將為有義者所惡。不月而日者。自是諸侯

不繫天子。若日不繫于月。穀其日。以其再致天子。

故謹而日之。註主善以內。謂公朝于王所。日惡于

外。言再致天子。

晉人執衛侯歸之于京師

左稱人以執罪及民也。諸侯不得相治。故歸之京

師。公歸之于者。罪已定矣。歸于者。罪未定也。穀歸

之于者。緩詞也。斷在京師也。胡歸之于者。執不以

正之詞也

衛元咺自晉復歸于衛

左傳元咺歸于衛立公子瑕。註元咺與衛侯訟得勝

而歸從國逆例者明衛侯無道于民國人與元咺

公手自者何有力焉者也此執其君其言自何為叔

武爭也。胡傳大夫不世其稱復絕之也自晉者晉有

奉焉歸者易也以文公為之主故其歸無難而方

伯之罪亦明矣

諸侯遂圍許 公羊無傳

左註會溫諸侯也許比再會不至故因會共伐之

曹伯襄復歸于曹 公羊無傳

左疏侯孺貨筮史致其誠心晉侯感其言而特釋曹

伯所以顯侯孺故從國逆例也。穀梁天子免之因與

之會其曰復通王命也。胡傳以賂得國春秋名之比

于失地滅同姓之罪

遂會諸侯圍許 公胡無傳

左註言遂得復而行不歸國也

晉文成霸始于救宋却楚其救宋却楚若何狐

偃曰楚始得曹而新昏于衛若伐曹衛楚必救

之則齊宋免矣晉侯從之既侵曹又伐衛衛請

盟不許而楚救至矣。楚方叔衛晉遽舍衛出曹。不意入其國執其君分其田畀其讎是先軫之謀也。晉人欲戰齊秦未可先軫曰使宋舍我而賂齊秦藉之告楚我執曹君而分曹衛之田以賜宋人楚愛曹衛必不許也喜賂怒頑能無戰乎從之而齊秦果欲戰也楚子玉使宛春告晉師曰請復衛侯而封曹臣亦釋宋之圍先軫曰不如私許復曹衛以攜之執宛春以怒楚既戰而後圖之從之而曹衛果告絕于楚也晉欲救宋則先伐曹衛欲與楚戰則先激齊秦楚怒益

甚晉謀方老子玉徒恃西廣東宮與若敖六卒以戰三大國之師能無敗乎城濮之役勝楚取威晉霸乃定于是盟于踐土會于溫諸侯無不從也踐土之盟天王下勞晉侯削而不書尊天王也溫之會晉侯召王以諸侯見書曰天王狩于河陽爲天王諱亦尊天王也杜氏曰周室旣衰天子微弱晉忽帥九國之師入京師臨天子嫌于篡奪因令王就會受朝事未必然抑其時朝覲會同其禮久廢王室之力不足以待諸侯卽諸侯未敢召天子天子未嘗不樂就見諸侯

也。王寵晉過禮，親至踐土，晉侯稽首受策，出入三覲，又會諸侯于溫，將相率朝王上，荅王寵且假王靈以討衛許，豈敢再致天子哉？王聞晉侯之來，而重其入也，狩于河陽，而就見之，諸侯因天王之意，朝于王所，于禮雖變，不損臣節。說春秋者所謂辭逆而意順也。衛與楚昏，晉侯伐之，曹伯執子玉，敗衛侯懼，出奔楚，遂適陳，使元咺奉叔武以受盟，是以踐土有衛子，晉乃許復衛侯，衛侯鄭之，得自楚復歸也。非楚有力，叔武之賢致之也。歛犬前驅，射殺叔武，元咺不平，奔

于晉，晉執衛侯歸于京師，置諸深室，則以爲奉天子討有罪云爾。魯使公子買戍衛，楚人救衛，不克，公懼，殺買以悅晉，其後惟晉是從。兩朝王所，楚之圍宋，陳蔡鄭許從焉。城濮之戰，陳蔡先奔及盟，踐土則蔡侯鄭伯從晉矣。陳侯雖後會，猶得如會許，獨二會不至，諸侯之師所以來也。書曰：諸侯遂圍許，會溫之，諸侯討許也。又書曰：曹伯襄復歸于曹，遂會諸侯圍許，曹方得復，遂從伐許也。四國之師能勝楚，十一國之師不能服許，雖晉之霸威幾以楚屈在許，寧獨無罪乎？

一年之內晉大敗楚師再致天王執曹伯復曹伯復衛侯執衛侯威福咸自出也其霸功震其用兵譎春秋詳之而難乎為繼也

附錄左一晉侯作三行以禦狄次曹會諸侯圍許後

僖公二十九年

庚襄王二十二年二十有九年

春介葛盧來 胡無傳

左註不稱朝不見公且不能行朝禮雖不見公國賓

禮之故書 公夷狄之君不言朝不能乎朝也 註不

能升降揖讓也進稱名者能慕中國朝賢君明當

扶勉以禮義 穀卑賤之故言來

公至自圍許 皆無傳

夏六月會王人晉人宋人齊人陳人蔡人秦人盟于

翟泉 會上公羊有公字翟作狄公穀無傳

穀疏左氏以爲王人者。王子虎爲下盟列國。晉人云云者。狐偃等爲上敵公侯。皆貶之稱人。何休注公羊云。晉文德衰。故微者往會。今穀梁旣無傳註。或如此說。王人以下。皆是微也。胡傳翟泉近在洛陽王城之內。而王子虎于此下與列國盟。是謂上替。諸侯大夫入天子之境。雖貴曰士。而于此上盟。王子虎。是謂下陵。

秋大雨雹

公穀無傳

左傳爲災也。公註夫人專愛之所生。穀註雹者陰脅陽臣。侵君之象。陽氣之在水。雨則溫熱。陰氣薄而脅之。

不相入。轉而成雹。胡傳僖公卽位日久。季氏世卿。公子遂專權。政在大夫。萌于此矣。

冬介葛盧來

公穀胡無傳

左傳以未見公。故復來朝。禮之加燕好。公註不稱字者。一年再朝。不中禮。故不復進也。

晉文公會諸侯于溫。爲伐許也。歷天王之狩。魯公之朝。衛侯之執。元咺之歸。而後書圍許。似魯之從晉。急在朝王。不在圍許。仍書公至自圍許者。本公志也。晉盛會諸侯以伐許。許未有服。又會王子虎。晉狐偃。宋公孫固。齊國歸父。陳轅濤。

塗秦小子勸盟于翟泉諸侯慮其未釋許也乃探其盟則以謀伐鄭故舍許謀鄭許誠小不足以煩大國然晉之威亦少頓矣介東夷國也葛盧慕魯來朝亦邠犁來之類也公在會不得見雖不見其禮已畢至冬復來其事魯勤矣明年遂侵蕭然則介再來魯非心恭魯乃窺中國也夷狄不可輕進即微國猶然

僖公三十年

辛襄王二十二年三十年

春王正月

夏狄侵齊 公穀無傳

左傳晉人侵鄭以觀其可攻與否狄間晉之有鄭虞也夏狄侵齊。胡傳晉文公若移圍鄭之師以伐狄則方伯之職修矣上書狄侵齊下書圍鄭此直書其事而義自見者也。

秋衛殺其大夫元咺及公子瑕

左註咺見殺稱名者訟君求直又先歸立公子瑕非

國人所與罪之也。瑕立經年。未會諸侯。故不稱君。

註公時已得天子命還國。于道路遇而殺之。坐之與

至國同。故但稱國。不復別也。言及公子瑕者。下大

夫。別尊卑。註穀衛侯不思致訟之愆。躬自厚之義。過

而不改。而又怨忌。上下皆失。註胡衛侯忌克。專殺濫

刑。

衛侯鄭歸于衛。穀梁無傳

註左魯為之請。故從諸侯納之例。公此殺其大夫。其

言歸何。歸惡乎元咺也。註胡衛侯出奔于楚。見執于

晉。不名者。責晉文公之以小怨妨大德。歸國。名之

者。罪衛侯鄭之以忤害戕本支。

晉人秦人圍鄭。公穀無傳

註左晉軍函陵。秦軍汜南。各使微者圍鄭。故稱人。胡

貶稱人者。晉文以私忿勤民。秦伯惟利為向背。

介人侵蕭。皆無傳

疏公來朝稱名。此稱人者。退之也。

冬。天王使宰周公來聘。公胡無傳

註公與葵丘會同義。

公子遂如京師。聘周之始遂如晉。聘晉之始

註左公既命襄仲聘周。又命自周聘晉。公時見使如

京師而橫生事。矯君命聘晉。故疾其驕蹇自專。穀
以尊遂乎卑。此言不敢叛京師也。註鄭曰遂固受
命如京師如晉。尊周不敢使並命。使若公子遂自
往然。即云公子遂如京師如晉。是同周于諸侯。叛
而不尊天子也。胡冢宰上兼三公。來聘于魯。天王
之禮。意莫厚焉。魯侯既不朝京師而使公子遂往。
又以二事出。夷周室于列國。此大不恭之罪。

左傳云僖公二十八年春晉侯將伐曹。假道于
衛。衛人弗許。還自南河濟。侵曹。伐衛。正月戊申。
取五鹿。晉侯齊侯盟于斂孟。衛侯請盟。晉人弗

許。衛侯欲與楚。國人不欲。故出其君以說于晉。
衛侯出居于襄牛。五月衛侯聞楚師敗。懼出奔
楚。遂適陳。使元咺奉叔武以受盟。或訴元咺于
衛侯曰。立叔武矣。其子角從公。公使殺之。咺不
廢命。奉夷叔以入守。六月晉人復衛侯。衛侯先
期入。甯子先。長牂守門。以為使也。與之乘而入。
公子歛犬華仲前驅。叔武將沐。聞君至。喜。捉髮
走出。前驅射而殺之。公知其無罪也。枕之股而
哭之。歛犬走出。公使殺之。元咺出奔晉。冬衛侯
與元咺訟。不勝。執衛侯歸之于京師。寘諸深室。

元咺歸于衛。立公子瑕。三十年夏，晉侯使醫衍
酖衛侯。甯俞貨醫，使薄其酖，不死。公爲之請，納
玉于王，與晉侯皆十穀。王許之。秋，乃釋衛侯。衛
侯使賂周欽。冶廛曰：「苟能納我，吾使爾爲卿。」周
冶殺元咺及子適子儀。衛侯迫于晉，附于楚，拒
于國人，畏敗出奔。一失國之諸侯也。叔武攝位，
以待衛侯。三月而復。甯武子與國人盟而後入。
惡衛侯者，國人也，非元咺也。叔武以悌見殺，咺
憤而出訟。侯再失國，子瑕之立，猶攝也。侯再入
而殺咺及瑕，責咺者曰：「以臣訟君，可以死矣。」然

瑕則何罪。衛侯始聞叔武之立，則殺元角。旣復
則殺叔武，殺叔武者，雖欽大實緣侯意也。元咺
不怨衛侯，殺其子而怨其殺叔武，其志哀其辭
直矣。衛侯再入，咺與瑕未嘗稱兵以拒，必賂周
冶，殺之而後入，臣之罪未甚于里克，而君之忌
深于晉惠，弟之心不同于叔段，而兄之忍過于
鄭伯受殺者，大夫元咺也。因咺而及者，公子瑕
也。君子曰：「公子瑕之死，又一叔武也。翟泉之盟，
晉謀討鄭，其所以討者，盟不至也。然文公昔嘗
過鄭，鄭不禮焉，夙憾未平，稱此爲名。明年，晉人

秦人果圍鄭矣。時狄方間晉，有鄭虞遂侵齊。晉不問也。鄭使燭之武說秦，秦伯疑晉，乃還師。晉不能立威于鄭，反開隙于秦，且使天下謂晉不能伐狄而伐鄭，霸三年而衰也。自翟泉始，春秋傷焉。

僖公三十一年

壬辰襄王二十三年三十有一年

春取濟西田 穀梁無傳

左晉分曹田以賜魯，故不繫曹，不用師徒，故曰取。

公不言取之曹，諱取同姓之田也。胡不繫國者，吾

故田也。復吾故田而謂之取，何也？春秋之法，不以

亂易亂。

公子遂如晉 公穀胡無傳

左拜曹田也。

夏四月，卜郊，不從，乃免牲，猶三望。

左傳非禮。註魯廢郊天而脩其小祀。故曰猶。猶者可

止之辭。疏卜郊不吉。不復為郊。牲無所用。故免牲。

穀梁免牲者。為之緇衣熏裳。有司玄端。奉送至于南

郊。免牛亦然。疏三王之郊。一用夏正。魯不然者。以

天子得冬至祭天。皇大帝。故郊所感之帝。皆以夏

正為之。魯不得冬至祭天。故博卜三正。從周正月

至于三月。皆是郊之時也。月各一卜。故云三卜。禮

也。四月非時。故云四卜。非禮也。左氏以為禮不卜

嘗祀。郊既魯之嘗祀。故一卜亦為非禮。公羊以為

天子不卜郊。魯郊非嘗禮。故卜之。求吉之道。不過

三。故三卜。禮也。四卜。非禮也。是三傳各異其用牲

也。何休以為郊天牛角繭栗。三望之牛角尺。其文

出于稽命徵。其祀也。郊祭則焚燎。山則升。水則沉

猶三望。公羊以為三望。泰山河海。賈逵杜預之徒

注左氏者。皆以為分野星國中山川。今范同鄭玄

之說。取禹貢之文。以為淮海岱也。胡諸侯祀天。其

僭極矣。春秋或以卜。或以時。或以望。或以牲。或以

牛。于變之中。又有變焉者。悉書其事。

秋七月

冬杞伯姬來求婦 左無傳

春秋四傳卷五
公註書者無出道也。胡傳母為子求婦。猶曰不可。况于他乎。

狄圍衛十有二月。衛遷于帝丘。于穀梁作於公穀無傳

左疏帝丘阻險。可以避狄難。公註月者。惡大國遷至小

國。城郭堅固。人眾強遷。徒畏人。故惡之也。胡傳衛侯

不能自強于政治。晉文無却四夷安諸夏之功。

三十年冬。天王使宰周公來聘。公子遂如京師。

遂如晉。三十一年春。公子遂如晉。三十三年。齊

侯使國歸父來聘。冬十月。公如齊。十有二月。公

至自齊。說春秋者曰。周公下聘而卿入拜。鄰國

卿聘而君往朝。無禮哉。魯之慢天王。畏大國也。

或曰。經書天王來聘者七。惟此使冢宰兼三公

者。下聘報其兩朝王所之勤也。酬禮在王。公子

遂再如晉。拜濟西之賜也。酬禮在魯。濟西田。或

曰。魯曹齊三國隙田。莫適主。故不繫國。或曰。我

舊田。復不以正。不書歸。使若取諸他人。然魯郊

非禮。夏四月。夏正春二月也。卜三辛不吉。更卜

次月上辛。延而間一月。習卜不吉。非禮又甚焉。

凡不郊。卜免牲者。牲嘗置之上帝矣。則為緇衣

纁裳。奉諸南郊。禮也。乃者。再有事之辭。三望。或

曰泰山河海。或曰淮海岱。魯在汶以南。泰山則汶北。河淮繞濟東。海出其北。去魯差遠。詩稱泰山巖巖。魯邦所瞻。卽望秦岱可。彼二方何居。謂可以無三望。故曰猶也。杞伯姬。我兄弟倚我援。降姑求婦。君子憐之。猶無恕辭。重婦人外預甚矣。采補

僖公三十二年

癸襄王二十三年三十有二年

春王正月

夏四月己丑鄭伯捷卒

捷公年作接皆無傳

公不書葬者。殺大夫申侯也。

衛人侵狄

左報前年狄圍衛。

秋衛人及狄盟

左不地者。就狄廬帳盟。公稱人而言及。則知狄盟

者卑。胡再書衛人而稱及者。罪衛也。

冬十有二月己卯晉侯重耳卒

皆無傳

三十一年狄圍衛。衛遷于帝丘。衛國禍初夷。再迫狄難。外不敢乞晉師。內不克扞圉。庶幾先君文公有行之。則擇險避。然春秋于文公。書城楚丘。事不繫衛。以大齊桓之烈。茲書衛遷于帝丘。誰實主霸。晉文難辭責矣。時衛惟甯俞是聽。豈須臾忘狄。是年夏。衛人侵狄。狄囂不整。偏師入其郭。乃就狄廬帳盟。書曰。衛人及狄盟。兩書人稱及。衛再世無狄患。厥謀是臧。全乎貶者。曰狄侮中國。乘其亂。合與國聲罪。可驅而得志。廼僅

一弱衛。以侵始。以盟終。霸主以下罔聞焉。貶衛所以嚴中國也。鄭伯捷逃。首止殺大夫。霸與獨後服。霸歿先叛。春秋惡之。卒不書葬。所繇與外諸侯赴告者殊矣。

采補

僖公三十三年

甲襄王二十五年三十有三年

春王二月秦人入滑公胡無傳

左滅而書人不能有其地穀滑國也

齊侯使歸國父來聘公穀胡無傳

左齊國子來聘自郊勞至于贈賄禮成而加之以

敏

夏四月辛巳晉人及姜戎敗秦于殽左傳穀梁作秦師

左註晉侯韓背喪用兵故通以賤者告姜戎姜姓之

戎居晉南鄙戎子駒友之先也晉人角之諸戎倚

之不同陳故言及。公其謂之秦何。夷狄之也。其言

及姜戎何。姜戎微也。稱人亦微者也。何言乎姜戎

之微。先軫也。或曰。襄公親之。其稱人何。貶曷為貶。

君在乎殯而用師。危不得葬也。詐戰不日。此何以

日。盡也。胡書序專取穆公悔過自誓之言。止于勸

善。其詞恕。春秋備書秦晉無道用兵之失。兼于懲

惡。其法嚴。穀梁

癸巳葬晉文公。左公胡無傳

穀梁日葬。危不得葬也。

狄侵齊。公穀胡無傳

左因晉喪也。

公伐邾取訾婁。訾婁公作叢穀作訾婁公穀無傳

左報升陘之役。

秋公子遂帥師伐邾

左魯亦因晉喪以陵小國。胡不義之兵。

晉人敗狄于箕。公穀胡無傳

左却缺稱人者未為卿。

冬十月公如齊。十有二月公至自齊。公穀胡無傳

左冬公如齊朝。且弔有狄師也。

乙巳公薨于小寢。公羊無傳

春秋口傳所
卷五下
禧公
五十四

左 小寢。夫人寢也。譏公就所安。不終于路寢。穀胡意同
隕霜不殺草。李梅實。隕公羊作實

左 書失時也。周十一月。今九月。霜當微而重。重而

不能殺草。所以爲災。公 祿去公室。政在公子。遂之

應。疏 陰威列見而散萬物。穀 京房易傳曰。君假與

臣權。則隕霜不殺草。從叛者。茲謂不明。厥妖木。冬

實重。菽也。輕草也。輕者不死。則重者不死。可知。胡

仲尼論隕霜不殺草。則李梅冬實。蓋除惡于微。慮

患于早之意。

晉人陳人鄭人伐許

公穀胡無傳

左 討其貳于楚也。

晉襄繼霸。不同齊孝者。殺之役始。或責其違殞

啟兵。則去年冬十二月。晉侯重耳卒。今年春二

月。秦人入滑。微弦高。且中鄭。鄭下。將逼東諸侯

定霸。左傳載。柩有聲如牛。先君其震諸。迺書晉

人貶。書及姜戎。譏汲汲者。曰。先君未葬。未成君。

不得稱侯。在師。不成子。不得稱世子。且曰。卽主

乎戰。原軫固將中軍。又昌是謀。奚慮不克。而必

墨衰。經爲。則書人以微之。使若君未卽事者。則

亦微者及之也。入滑罪秦。書秦人。敗殺兼責晉。

既書晉人則治秦加嚴故夷之曰秦黜秦而晉
怒矣日葬晉文公穀梁危之危其克敵後葬非
可必之事並危其志不在葬也然是年晉凡三
戰敗秦又敗狄伐許文公徂狄惠縱狄侮中國
又公甫沒侵齊且及晉敗于箕狄始知畏許二
楚霸盟不至終文公世無降心則合陳鄭伐許
二役其幹子矣迺敗狄以偏師稱人伐許亦稱
人者雖先志于事得已斬焉喪服弗之可忍爾
公偷而闇前齊桓沒歲再伐邾今乘晉喪復再
伐邾名曰報升陘之役寔則害霸又懼繼霸者

齊亟朝以自托夫齊與我有穀怨二十八年因
晉文公子遂聘齊以解越六年國歸父始來烏
知非嘗我乃彼以大夫聘我親往報損威棄禮
耻孰甚詩喻相鼠其遄死夫如齊書致者反未
幾公薨危不得致也于寢暱也隕霜不殺草李
梅寔君權下移天則恒燠十年之間政逮襄仲
則其應也且季友受費公孫茲公孫敖帥師三
桓皆肇自公故于公薨著變讀春秋則疑魯頌
矣采補

